

ASO LULU, 22 JANUARI 2020

Na nofoia e le Fofoga Fetalai le Nofoa i le itula e 9:00 i le taeao.

Tatalo.

FOFOGA FETALAI: Ou te faasilasila atu ua toe amatalia nei Taualumaga ma Galuega a le Fono Aoao Faitulafono. Ia, malo galulue malo foi le tauatai i lenei taeao, e ui lava ina louloua le tau a o lo o faapena ona lagona le agaga faamalosi o lau Afioga i le Palemia faapea le Kapaneta ma sui usufono mamalu o le Palemene e faaaauai ai le tatou galuega, ae a Ofisa Sili o Pulega o Matagaluega ma Faalapotopotoga a le Malo i lenei taeao. Ia, tau ia ina ia manuia le alofaiva ma le Fonotoa.

TUUINA ATU O PEPA

Na tolaulauina e le Failautusi Pepa nei ua faataatia i luga o le Laulau a Fono, e tusaii ma T.T.49(2).

1. P.P.2019/2020 Nu.150, Lipoti Faaletausaga a le Kamupani o Auaunaga o Vaa i Samoa 2018/2019.
2. P.P.2019/2020 Nu.151, Lipoti Faaletausaga a le Matagaluega o Aoga, Taaloga ma Aganuu 2018/2019.
3. P.P.2019/2020 Nu.152, Lipoti Faaletausaga a le Matagaluega o Faalapotopotoga a le Malo 2018/2019.
4. P.P.2019/2020 Nu.153, Lipoti Faaletausaga a le Ofisa o le Komisi o Faiga Palota 2018/2019.
5. P.P.2019/2020 Nu.154, Lipoti Faaletausaga a le Ofisa Tausi Mavaega a le Malo 2018/2019.

TUUINA ATU O LIPOTI A KOMITI FAA-PALEMENE

Na tolaulauina e le Failautusi Lipoti a Komiti Faa-Palemene ua faataatia i luga o le Laulau a Fono e tusa ai ma T.T.52(5).

1. P.P.2019/2020 Nu.147, Lipoti a le Komiti o Tulafono Tumau i le P.P.2019/2020 Nu.11, Iloiloga a le Komisi o le Toefuataiga o Tulafono a Samoa i le Tulafono o Meatotino 1952, Lipoti Faaiu 23/18, Novema 2018.

2. P.P.2019/2020 Nu.148, Lipoti a le Komiti o Tulafono Tumau i le P.P.2019/2020 Nu.15, Lipoti Faaletausaga a le Komisi o le Toefuataiga o Tulafono a Samoa 2017/2018.
3. P.P.2019/2020 Nu.149, Lipoti a le Komiti o Tulafono Tumau i le P.P.2019/2020 Nu.70, Lipoti a le Komisi o le Toefuataiga o Tulafono a Samoa i le Iloiloga pe Faamata e Talafeagai le Faatulafonoina o le Fefaaasoaiga o Faamatatalaga i le Va o Matagaluega ma Faalapotopotoga a le Malo – Lipoti Faaiu 24/18.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2019/2020 – felafolafoaiga faaauau i luga o le
faitauga faalua – Aso 2**

FOFOGA FETALAI: E tolopo Galuega a le Fono Aoao i le po anapo o lo o saunoa le sui usufono mo Faleata i Sisifo, a o lo o faamauina foi a maea le saunoaga a le sui usufono mo Faleata i Sisifo ona tuuina atu loa lea o le avanoa i le Komiti o Tupe.

Ou te tapa lau Afioga i le sui usufono mo Faleata i Sisifo mo lau saunoaga.

Afioga SALAUSA JOHN AH CHING (Faleata Sasae): Ia e tulai atu i le ava ma le faaaloalo tele i lenei taeao fou, o le sui usufono lenei mo Faleata i Sasae mo le faasaoga o faamaumauga a le Fono Aoao Faitulafono.

FOFOGA FETALAI: Ia, e uso a sasae ma sisifo, e oso ifo le la ae goto i sasae.

Afioga SALAUSA JOHN AH CHING: Faafetai tele i lau Afioga i le Fofoga Fetalai mo le avanoa ua toe tuuina mai, faafetai atu mo le taulaga ua siitia i lenei taeao i faamanuiaga a le Atua i le Fonousu a Samoa. Faamalo atu foi i le Palemia ma lenei Palestine i le soifua maua ma le lagi e mama, alafai mai i fanuga lelei i lenei taeao fou. E faamuta le Fono anapo o talanoa i nisi o mafaufauga. Ae maea le Fono anapo ae talanoa mai nisi o sui usufono se i toe faamalamalama atu le tulaga lea i le misela, se i toe taua atu lava le mea lea i le misela e pei foi e fou i le latou foi faafogoga. O le mea lea, e faamalie atu o le a toe see laitiiti lava i tua, toe faamanatu atu le tala na fai anapo, o le misela e mafai e lo tatou atunuua ona lafoai i nuu le aina po o le nuu e le o soifua ma ola ai ni tagata, aua o le siama lea o le misela, na o le tagata soifua lava e ola ai, e le ola le siama o le misela i luga o se vai po o se pau matu po o se meaola po o se manu se i vaeatu le paia o le taeao, e na o le tagata soifua lava e ola ai. Ma e mafai ona opeopea i luga o le ea ma le savili, e na o le lua itula. O lona uiga, a

faapea e tui uma tagata Samoa e tatau ona tui i le tui puipuia, o lona uiga e leai se isi e tatau ona toe mai i le misela. O lea la ua fai ifo i lalo le maemaea o le misela ma i nai aso ia ua tuanai atu, e foliga mai e leai se isi o toe lipoti atu ua toe mai i le misela. O lona uiga, o lea afai e le toe tupu mai se gasegase o le misela i le isi 12 masina lea o lo o i luma, o i ina e tau mai ai ua leai se misela, ua pulea e Samoa le misela. Pau le auala o le a toe oo mai ai le misela i totonu o le tatou atunuu, o se tagata o lo o i inei i Samoa e le i faia se tui puipuia ae toe malaga atu i fafo i Niu Sila, Ausetalia, po o fea o le lalolagi lea e salalau solo ai le misela ae toe foi mai, o i ina e toe aumai ai foi le siama o le misela ona toe mamai ai lea o e e le i tui puipuia. Ma e manatua lelei e le Maota lenei, o lo o i ai lava le vaega o le tatou atunuu e le mafai ona tuia e pei o nai a tatou fanau iti i lalo ifo o le ono masina e le mafai ona tui. Ia o nai tina maitaga, maito, e le mafai ona tui, o i latou e maua i le kanesa e le mafai ona tui. O le vaega la lena e faalagolago lo latou saogalemu pe a faapea e tui uma tagata e tatau ona tui, ona tatou maua lea o le mea lea o le mea lea o le **herd immunity**, po o le puipuia o tagata e toatele. A puipuia tagata e toatele, a faapea o le Maota lenei mo se faataitaiga, a o le vaega lea i tua i i o lo o i ai le tatou vaega lea e le mafai ona tuia ona o tulaga ia na faamatala atu nei, ae ulufale mai le misela i o i le faitotoa tau mai i le vaega lea o lo o i luma ua uma ona tui puipuia, e le mafai ona toe sao mai le misela i tua i le vaega laitiiti lea e i tua e le o mafai ona puipuia ona e le o mafai ona faia o latou tui. O le uiga tonu lena o le **herd immunity** o le mea lena o lea sa tulituliloa e le tatou Malo i le taimi lea sa fai ai tatou tuiga. O le fesili foi i nisi o sui o le atunuu i le saogalemu o le tui o le misela pe lelei atoatoa foi, o lea ua uma ona tali i ai le tali i ai le tatou polokalame lea na fai nei, o le tatou tuiga lea na fai nei, masalo pe lata lava i le 190,000 tagata o le atunuu na tui leai se isi na faatamaia pe na faaletonu i le tui o le misela. O lona uiga ua tau mai i ina, e saogalemu lava le tui o le misela. E aoga lelei le tui o le misela, lea foi ua faamaonia i le polokalame lenei, e aoga lelei le tui o le misela. A na le aoga le tui e le uma le pipisi o le faamai. O le tele o le tuiga na fai, o i ina na vave ai ona taofi le salalau o le faamai, o i ina foi la lea ua faamaonia ai e aoga lelei le tui. Masalo o le a ou see atu loa i se isi vaega o le lauga.

FOFOGA FETALAI: Tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumaleemana Dr. Sailele Malielegaoi (Palemia): Lau Afioga i le Fofoga Fetalai, ona e taua tele le faaaliga lea ua aumai, e le afaina e tusa lava pe uma lau lauga o e talanoa i le misela, ae onosai mai se e i ai nai a matou fesili ia e fia fai atu.

Lau Afioga i le Fofoga Fetalai, aemaise lava le tausaga lenei o lea ou te maua atu i faasalalauga po o le 400 i le 500 pepe ia e fananau i le masina.

O lona uiga afai e 500 pe afai e aofai uma ai pepe, leaga o isi pepe e faafananau e faatosaga i tua. A faapea la e le tatau ona tuia foi ma tina ae 500 le aofai o pepe faaopoopo i ai ma tina e 500, o lona uiga e oo atu lava i le 1000 le aofai o i latou ia e le i tuia. O lona uiga e tatau ona fai ni o latou tui puipuia. O le faafesili atu ona o oe le isi fomai sa matua tele lou sao i totonu o gaoioiga ia sa fai. O le a tonu lava sou manatu i tina nei ma le toatele o tatou e oo lava i tama, ma le toatele o i latou foi lea sa matua le talitonuina le tui ma oo lava ina faamalosia mea ia sa vaai e o atu le au tui, e i ai taimi e tui atu ai le tina ae oso i le faamalama le tamaitiiti e sola i fafo ma tamoe ese ona o le tulaga o la e fefe, i luga o le manatu e tui loa oti. O le a sou manatu i ai mo le agai atu i le lumanai ona o le tulaga lenei e le na o le tasi le tui puipuia lea e fai e le na o le misela. O lea ou te mataua atu i le pepa lea o lo o faataoto atoa mai ai lava mo le silafia e le lautele le polokalame lea a le soifua maloloina i tui e tatau ona fai i faamai eseese ia e lavea ai tamaiti. Se i aumai lava sina ou finagalo i le mea lea ua matua aliali malosi mai i le faamai lenei ma le agaga musua o le toatele o le tatou atunuu i le mea lea o le tui?

FOFOGA FETALAI: Tulai mai le sui usufono.

Afioga SALAUSA JOHN AH CHING: Faafetai, faafetai mo le faafesili a lau Afioga i le Palemia. O le tulaga i le saogalemu, o lea ua ou taua le saogalemu o lea ua uma ona faamaonia i le tatou tuiga ua tea atu nei. Ae moni le finagalo o lo o tele isi a tatou tui puipuia o le tele o isi faamai. Masalo foi o le isi lea mea, ai ona ua fai si leva ma le augatupulaga lenei o lo o i ai i le vaitaimi lenei, e le i silasila ma vaai i faamai ia, i le taimi ua tuanai, e pei o le tale vivini. O le tale vivini, o nai fanau e fetalei ai i le tale lea, e tale tale lava toe a mole. E pei e faapea lona uiga.....e faapena, e tale tale tale, ona pei o lea a vivini mai, ua tau manava, o le mea lena o le tale vivini, o le isi faamai matuia tele o le auvae loka po o **letetanus** E tele ina loka ai le auvae, ae o le tui puipuia, o lea e masani ona tau e tatou o le tui ona. O siama la o le **tetanus**, e i totonu o le palapala, e faapea lea a lavea le vae o se tagata, e lavea ae faapea o la e palapala le mea na lavea ai, pe lavea foi i se fao elea ua leva ona taatia. Ua masani la le atunuu e o e fai le tui ona, ae ua lelei tele lea, tasi lea masani lelei o lea ua masani ai le atunuu, e o e fai le tui ona. O le tui ona la lena e puipuia ai le mea lea, e puipui ai le auvae loka. E tai lima i le 15 ma faafou, e toe fai lou tui lea ina ia puipuia ai oe. O le lipi, o le mami, o le mami lea e fulafula ai aulamu, ma e i ai foi le isi afaina o le mami e tele ina afaina ai tama tane, e afaina ai totogasa o tama tane, i le faamai lea o le mums, e tele lava mea e tutupu mai ai. O mea la ia o le tele o nei mea, e oo i le fatafata vaivai po o le **TB**, o lo o fai foi le tui puipuia o le **TB**, ua tele foi la ina mou atu le TB ua pulea e lo tatou atunuu. O aso ia i le Soifua Maloloina sa ese lava le vaega o le falemai, e tele foi lena vaega sa faapitoa lava le latou galuega, na o le

TB lava ma le lepela sa vaai ai. O le taimi lenei o lea ua mou atu, ona sa fai tui puipuia o le TB ia. O le mea lea, o le tele o nei faamai ua tatou le toe vaai i ai, ai foi o le isi lea mafuaaga e maua ai le faatuatanai o mafaufau o tagata i tui puipuia. O lea la ua avea foi la le tupu mai o le misela ma le mea o lea ua toe fagufagu mai ai i lo tatou atunu, le faatauaina o tui puipuia. Aua ne i o tatou faatalitali se i tupu se faalavelave, ona tatou toe tapa la lea i le iofifi. E leai tapa lava i le iofifi, uu le iofifi i aso uma, aso uma, e fai le tui puipuia, ia aua nei mu le lima. Tatou feoai lava ae ua puiapuia uma i tatou, aemaise nai a tatou fanau. O aia tatau a fanau o le latou soifua maloloina, e le mafai ona faatino e i latou. Lau Afioga i le Fofoga Fetalai, e faamoemoe i le Atua. E faamoemoe i le tagata matua e ave le fanau e fai tui puipuia. O le isi lea mea e taua tele i le faatinoina o tatou tui puipuia.

O lea na uma nei, o lo o faagaso i le taimi lenei le isi galuega ua taua e lenei Matagaluega o Tina ma Tamaitai, e sau se taimi ona saunoa lea i ai o le Afioga a le Minisita. O le **mop up**, ua matou taua o le **mop up** service po o le mop up program. O lea ua toe taamilo atu i tua e mulimuli atu i tuiga ia na fai, mai lea fale i lea fale, o lo o agai i totonu o aiga, e saili po o i ai nisi e le i tuia. Ao le a le mafuaaga ua le mafai ai ona tui, ona aumai la lea o faamatalaga nei, ina ia toe fua i ai ni gaoioga a le tatou Malo. O e uma ua uma ona tui, o i latou na o lo o usitai, ao i latou o lea e le i tuia e mumusu e tui, o i latou la na.

Tofa Olo Fiti Afoa Vaai (Salega Sasae): Lau Afioga i le Fofoga Fetalai, na o si mea lea e fia faamalamalama

FOFOGA FETALAI: Tulai mai le sui usufono mo Salega i Sasae.

Tofa Olo Fiti Afoa Vaai: Faafetai i lau afioga mo le avanoa. E fesiligia lava le sao o faamaumauga, ona o lea na taua foi i le faasalalauga foi a le Minisita lagolago, e 400 tamaiti e fananau i le masina. A ou fua atu la lau afioga i le Fofoga Fetalai, e 8 masina ia na faapafala ai le faiga o tui o le tatou atunu. A ou fua la 400 i le masina, e 3200 tamaiti lea na matuai aafia gofie i le faamai. Ae na o le 83 tamaiti ia sa aafia lo latou ola i le faamai. O lea la ou te fia fesili atu, po o fea la le isi 3117 tamaiti. Ua ala ona ou fesili atu o faamaumauga ina ia sao, po o sao le 400 lea o tamaiti i le masina. E pei o le mea lena ou te fia malamalama ai, o la e faafogoa mai le atunu. Ma le faaaloalo faafetai.

Afioga SALAUSA JOHN AH CHING: Faafetai mo le sui usufono mo le fesili. O le 400 i le masina e sao lelei. O le fesili lea sa ou fesiligia ai ia Dr Fidow, o ia lea o se tasi o consultant i le tatou Matagaluega, po o le falefailele i Motootua. E pe fia tina o lo o fananau i le tatou falemai tele i le masina. A o le fuainumera lena na tuuina mai e 400 i le masina. Afai la e fua faapena, o lea sa saunoa i ai le Palemia, o le aofai foi lena o tamaiti i le

6 masina, pe a fua i le 6 masina e le o mafai ona tui puipuia. O i latou na o lo o lamatia le soifua. O le fesili la le sui usufono po o fea o i ai le isi vaega? O le mea e faafetaia, e le i maua ai le isi vaega, o lona uiga, o le vaega la lena, masalo o lea ua puipuia i lalo o le **herd immunity**. Ona ua puipuia le toatele o lea ua mafai ai ona faasaogalemu le isi toatele o a tatou fanau ia, ma fafine maitaga ia e le o tui puipuia. O le taua lena o le tatau ona fai le tui puipuia o e uma e tatau ona tui. Aua a puipuia uma le vaega lena, ua puipuia uma a tatou fanau laiti ia, ma tina maitaga. O le tali atu lea i le fesili.

Ae tulai mai le fesili o ou talanoa i le **mop up** program lea a le Matagaluega mo Tina ma Tamaitai Atinae o Nuu ma Afioaga ma Agafesootai. O lea na mulimuli atu i tua o le tuiga lea na fai nei. Ma o la e tau faamaea lava i le taimi lenei, si taimi ona saunoa lea i ai le Minisita, ae o le polokalame lea, o lo o faamaonia mai ai, o la e toatele e le i tuia. O la lava e i ai tagata e le i tuia. O lea foi e i ai i le polokalame lea, o lo o tuu atu ai ma le fesili, po o le a le mafuaaga ua le tuia ai ia tagata. E taua ia mafuaaga ia se i aumai, e toe silasila totoa i ai le komiti o le Misela, po o le a le isi faiga e tatau ona fai ai.

FOFOGA FETALAI: Toe lua minute o le sui usufono. E manaia le saunoaga ae ona o le tatau galuega o lo o faagasolo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr.Sailele Malielegaoi: Lau Afioga i le Fofoga Fetalai, ou te tulai atu e faatu, *se lima minute e faaaauai ai le talanoaga o le mataupu lea, ona o le mataupu lea e ogaoga, lea e tuuaia ai i latou o lo o galulue i le Soifua Maloloina.*

Faaluaina e le Kapaneta

Na faamaonia le lafo.

FOFOGA FETALAI: Ua faaopoopo le lima minute. Saunoa le sui usufono.

Afioga SALAUSA JOHN AH CHING: Faafetai i lau Afioga i le Fofoga Fetalai, manatua na ou see ese mai le misela, ae te i ua toe tuu au i le misela ona o le talosaga a le Palemene. O le mea lea faafetai. O lea o le a toe fai atu se isi lua minute, ne i te i ua uma lou taimi. O le **mop up**, o le taua ia o le mea lea, ma avatu ai ma fesili, po o le a mafuaaga. Ona o mea ia e tatau ona silasila i ai le komiti, ina ia toe fua i ai le isi gaoioiga i le mea e tatau ona fai. Aua o i latou ua uma ona tui, o i latou lava na e usitai ma augofie e fai le tui. O i latou e le i tuia, e special la, o lona uiga e i ai mafuaaga matuia ua le mafai ai ona fai le tui. O le mea la lena e tatau ona

silasila i ai le komiti, ma toe fai le isi fuafuaga fou e faasao ai le mea lea, ia le tulaga lea o lo o i ai. O lo o ave foi i le polokalame lea, le toe faatauaina o le soifuaga lautele, o tagata, ma tilotilo i le siosiomaga ma tulaga faapena. O le isi vaega lona tolu o le suesuega lea, o lo o toe faamanatu atua i i tagata ia taga a le misela, uiga o le misela ma auga o le misela ma auala e puipuia ai. O le polokalame lena o lo o faagasolo nei, masalo e tatau ona maea i le vайасо lenei. O le mea lea afai ua leai se isi fesili i le misela. O le a ou see atu loa...

Afioga Fuimaono Teo Samuelu Teo (Falealili i Sasaе): E talu ai ona o lea ua manaia le vaega lea tatou te malamalama atili ai i le faamai. A o se fesili i le afioga i le sui Minisita. Faamata e le o le tui le mafuaaga e mafua ai ona fefefe, aua e tau loa le tui fefe le tamaititi, fefe le tagata e tui. Pe leai se isi faiga, pe faaliu fualaaau le tui lea, pe i ai se vai ia faafaigofie ona inu e alo ma fanau iti, ina ia aua nei faafefefefe i latou. Aua e tau loa le tui e fefefe e pai le tui i le tino. E pei o le isi lena vaega. E na o se fesili faapena, pe i ai se vaega e faaliu fualaaau, pe faaliu suavaia le tui lea, e mafai ona taumafa sao ae le tuia. Ma lou faaaaloalo.

FOFOGA FETALAI: Faasaoina le taimi o le Minisita lagolago, se i tulai mai le isi Minisita lagolago.

Susuga Mulipola Leiataua Laki (Aiga i le Tai): E fia tulituliloa le saunoaga faatupumanatu a le Palemia, e uiga i le 400 tina maitaga lea e le o aafia i le tuiga. O le taimi e tuueseese ai, o le a tonu la le taimi e tatau ona faaoo ai le tui i tina ia, ina ia faaitiitia ai le numera lea. Aua e moni lava i le vaega lea e pei ona taua o le **herd community**, ae a faapea e pito i luma tina lea e le i tuia ina ua uma ona tuueseese ma le tamaititi i le taimi e sau ai le faamai. O lona uiga o le a leai se malupuipuia o i ai. Ae po o le a tonu le taimi e tatau ai ona faatino ai le vaega lea i le tuiga o tina pe a oo ina tuueseeseina ma alo ma fanau? Ma le agaga faaaloalo.Faafetai..

FOFOGA FETALAI: Tulai mai le sui usufono mo Anoamaa i sasaе.

Afioga Alaiasa Muagututia Moefaaouou Malagaitutogiai Sepulona Moananu (Anoamaa i Sasaе): Ua alu anapo o matou faalogologo i le folasaga o le misela e le sui mamalu. O lea foi ua toe alu ma lenei taeao lau Afioga. O le mea lava ia, e i ai le upu foi lele, ua velo le tao ae ua tau. Tatou te toe fai atu nei mea ae ua maea ona tupu, ae aoga mo le agai i luma i le tatou lumanai le folasaga. E pei ua faasemina lo tatou taeao. O lea ua uma ae fai mai pe i ai ni fesili, pe ua uma ni fesili. A o le mea sa ou mataitu i le sui usufono lea, i le tolu ma le afa tausaga, sa nofoia mea ia, o faiga faavae ma mea nei a lo tatou Malo sa tofiaina ma valaauna i ai. A o lenei la ua tupu mai loa le faamai ua toe masua uma mai le matagofie o le

folasaga, ae paga lea, ua tatou tu i le tulaga faaletonu. Po o le mea sa taotaomia o ia i le aumaiga o lana fesoasoani lea i faiga faavae pe sa taofi e le Minisita sa i ai le faaaliga o lona finagalo matagofie lea, a o lea o le a alu ai ma le tatou taimi. O le mea lea lau Afioga, e pei ua avea lenei faamai pei ua fia niuali ai isi ae le o e tatalo ma tuu i le Atua le faamoemoe. Ou te fai atu au o le matou itumalo atoa, e leai ma se tagata e toatasi na lavea ma aafia i le faamai ona e i ai foi le matou metotia. Ia manatua e i ai lou atalii lea na tafana tamaiti lea foi na taofi e le Malo, o lou atalii. E ui lava ina tauvalea ai ma au i le mea lea, ae sa fai lava foi lana galuega fesoasoani. O le mea lea lau Afioga, tatou see ese ia ma lea tulaga, aua tatou te toe elia le tagata ua oti se i tulou, o mea ua tuanai. Agai i luma le tatou sa ma le agaga fiafia ma tatou o e tuu i le Atua le faamoemoe o le tatou atunu. Ma le faaaloalo.

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e i ai le isi Ekalesia na fai tonu lava le mea lea, tuu i le Atua o tatou faamoemoega ae aua le avea e tui, ia lea la na feoti ai isi. O le uiga o le mea, e tuu i le Atua lo tatou faamoemoe ma ave fanau e tui. O le sao lena o le mea. O le tulaga lea na saunoa ai nei le Minisita Lagolago, e taua tele ia te au. Aisea? Leaga o tupe uma ia na aumai e fesoasoani mai ai lea e i totolu o le Paketi lea ua aumai i totolu o le tatou talanoaga mo le fesoasoani lautele ina ia faaauupegaina le falemai i le tulaga o mea e tatau ona fai, e le gata la i le falemai i Motootua, a o falemai uma lava i tua. E le gata na o le misela ae faapea foi ma isi faamai uma lava. E taua le mea lea ona o saunoaga ia na fai i totolu o le Maota lenei e pei e foliga mai e leai ni mea na faia e le tatou Soifua Maloloina. O le mea la lena o lea ua tatou faalogologo atu nei o la e fai lava le galuega e le o taofia. E oo foi la i le isi faamai lea ua sosolo ane i o mamao lava ma tatou, a o lea e fai lava le latou galuega o le lapatai. O le mea foi lele o fonotaga faapenei, o lea e faaaoga e isi e sao ai la oe e faasalalau atu ai lo latou poto ua tele. A o la e fai lava le latou galuega e le o taofia, ae i ai la tatou uiga ia i totolu o le tatou atunu. Na sau le isi papalagi talanoa ma... fai mai, ou te ofo o lea ua feoti tagata a o lenei lava e le avea e tatui. Ou te ofo o lea ua uma le taimi ua lifi le mea ua uma a o lea e feoti lava tagata i le le avea e tatui. O le a le mea ua faapea ai Samoa? Tali le na talanoa i ai, o le mafafia tele o matou tu ma matou agaifanua ma matou lava talitonuga, leaga o lea e feola tagata sa... ma i tatou uma i totolu o le Maota lenei. Masalo e leai ma se isi o i totolu o le Maota lenei e le i sulufai i fofa nei faaleaganuu, fofa Samoa. Ma o fofa Samoa sa nafa ma le togafitiga o gasegase ia, ae faatoa maua nei ananafi le tui lea i le 1963. O lona uiga o tatou uma lava sa fananau i tua atu o le 1963, lea sa togafiti lava tatou i togafiti lea sa o agai i ai nai tina ia. E le

faapea foi la o la e sese tina, o la e mulimuli lava i a tatou tu ma a tatou agaifanua. O le mea lena e taua ai ia te au le mea lea. A o le tulaga taua sa latou le mafai ona talitonuina o le niumonia lea e sau faatasi ma le mai, lea la e le i oo i ai le latou talitonuga o le niumonia lea o le a afaina ai le pepe. O le tui foi lea sa tui ai, pe lua vайaso faatoa aoga. O lona uiga la, a aumai lau pepa ua lima ono aso e aumai e toe tui, e tui atu ua le aoga le tui aua e le umi ae maliu le pepe ua tau faiga a le niumonia. Lau Afioga i le Fofoga Fatalai, o le ala lena e taua ai ia te au le faasilasilaga lea e aumai nei, ona o nisi na maliliu sa lavevea i le mea lea o le faatuatua i le Atua ae aua le tuia. O le mea lea na fai ai lau tautalaga i inei i le Maota lenei i le faifeau lea na nofonofo lava e faatalitali le fesoasoani mai a le Atua a ua alu ae lava le lolo. Lua vaa faaola na auina mai i ai ae le oso i ai i le vaa faaola lea la na maliu ai. O le tala faatusa. Alu atu loa fatalai ane lo tatou Alii, o lea le mea ua e vave sau ai e le i oo i lou taimi? Ae fai le tala a le faifeau, ua ou faagaulemalie a ia te oe, na ou faalagolago mai ma ou faatuatua mai. O le a le tala a le tatou Alii, “O le faatuatua e o gatasi ma galuega. Na ou auina atu vaa faaola na e lua ae te le oso iai. O ai o le a e toe faatalitali i ai?” O le tala foi lena a le Alii na fai i le toeaina lea na maliu i le misela lea faatoa maliu atu nei, “Na ou auina atu levaa faaola ia te oe e ala i au fomai, a o ai e te toe faatalitali i ai?” Lau Afioga i le Fofoga Fatalai, o le tali lena e tali uma ai lava manatu ia e fai mai satatau ona amata le tui ia ai, sa tatau ona amata le tui ia ai. E le mafai, le mafai ona faamalosia le tagata o la e talitonu, le talitonu la lea na tulai mai ai le sui usufono. Tatou tatalo i le Alii e aumai se fesoasoani ae le amanaia auauna a le Alii lea ua tuli mai e aumai le tui e te ola.

FOFOGA FETALAI: Malo faafetai. Ia, se i tuu atu lava le avanoa i le Minisita ona tuu atu ai lea ia Anoamaa Sasae.

Afioga Hon Tuitama Talalelei Tuitama (Minisita mo Tina ma Tamaitai, Atinae o Nuu ma Afioaga ma Agafesootai): Lau Afioga i le Fofoga Fatalai, mo le faasaoina o le taimi o le sui usufono, ma leaga o lea sa taua foi lenei Matagaluega i le tulaga o le tatou galuega faifaatasi mo le misela.

Lau Afioga i le Fofoga Fatalai, ou te tu atu ona o le mop up operation lea sa taua, ona o le Matagaluega lenei o lo o faatinoina le mop up lea. Talu ona uma le tatou shut down foi lea a le tatou Malo mo aso e lua lea sa i ai, sa faagasolo pea le galuega a le Matagaluega lenei, e 30 teams sa auina atu i tua, e 10 i Savaii ma le 20 i Upolu nei, e o la e saili latou nei lea na misi i le mass vaccination lea sa tatou faia i le lua aso lea na tapunia ai a tatou galuega ae galulue uma le Malo mo le puipuia o i latou ia e le i oo atu i ai le tui. Ina ua uma la le lua aso lea, sa faaauau pea le galuega a le Matagaluega nei ma e ina ua maea le vайaso e tasi o le latou galuega, o lea sa fai ai ma ou molimaunia foi i le Kapaneta le anoanoai o i latou o lea na

toe maua mai e le i tuia, e ova i le 1,500 i latou na maua i le vайасо lea e tasi talu ona uma le tatou shut down e le i tuia. O lea la lisi sa tuuina atu i le taimi lea o lo o functional pe a le tatou NEOCC ona o le auala lea o lea sa fuafuaina mo le lipotia o i latou nei ma tuuina atu ai i le soifua maloloina ina ia faagasoai le tui puipui lea ia i latou ia o e sa tusitusia mai o latou suafa matai i o latou aiga, o latou tausaga ma mea uma faapena ma o latou nuu ina ia faafraigofie ai le galuega lea o le toe tuiina o i latou ia e le i tuiina i le tui puipuia. Ina ua toe ae mai a tatou galuega, sa toe faagasoai foi la le galuega lea a le Matagaluega nei, ma mai le aso 8 le aso Lulu, le aso 8 o Ianuari e tau mai i le aso 10 o Ianuari, e 275 i latou na maua mai aso ia e tolu e le i tuia lava. O lea la ua tuuina atu foi o latou suafa i le tatou Matagaluega o le Soifua Maoloina ina ia faagasoai i ai le tui ia i latou nei. E le o ia te au la le numera o le vайасо lea na tea nei, ae ou te talitonu masalo o se mea foi o le a ou avatu i se taimi mulimuli pe a ou tali atu i le taimi e tali ai le Aiga Minisita. A o le agaga lea ua ou matauina, e le o mafai lava ona talia e o latou tagata le galuega fita lea o lo o tatou taumafai atu i ai i le tele o nisi o latou atunuu. O le uluui aso muamua ina ua ae mai galuega sa valaau ai le fono a matou ma sui o nuu ma sui o tina, ia, sa fai ai foi lau mataupu lea i le misela, ma tau atu i ai ia i latou nei, o le misela e le faapea e uma loa uma. E le o malamalama i latou nei, o la e faapea e le afaina aua o lea a maua lava foi i le misela o lea e ola isi tagata sa faasaoina mai sa maua i le misela. Ia atonu e faapena foi. E tau faamatala atu la i ai le ogaoga o aafiaga o le misela pe a maea le misela, aemaise o i latou ia e matutua ma tamaiti, e i ai aafiaga o le misela e faaauau e oo atu i le tolu i le lima tausaga o faagasoai pea aafiaga o le misela pe a sao le misela i lou nervous system po o lou faiai ma neura o lou tino. E tele lona aafiaga ma e faigata la ona toe faia i ai se togafiti e irreversible le process lea. O le faamai la lea e taua o le **subacute scelerosing panencephalitis** afaina ai le faiai o le tagata. E le mafai la ona toe faia i ai se togafitiga. Ae tu ae le isi toeaina le isi sui o le nuu, oi, o a na ituaiga faamatalaga faapena faavalevalea. Ou te le talitonu i na mea. Ia o le a leai la se mea e mafai i ai ae o le a faapefea? Ia ona ou faamatalaina lea i si toeaina, o le matou galuega o le logologo atu. O le talia ma le le talia e oe o le mea lea e tau atu, o lau aiatatau lena, e le o se mea lena a matou. A o lea e fai le matou tiute, logologo ma fautua ma lapatai. A e le talia la, o lou lava la lena aiatatau. Ia o le tulaga la lena o lea ou te iloa i ai, o le faalavelave lea e faigata ona talia e tamaiti tui puipuia, o latou lava o matua, ua tele matua ou te faalogo i ai a faalogogata loa le tamaititi, ia, e ave oe e tui e? E toe fai loa ave loa oe i le fomai e tui. Ua faafefe e fomai, faafefe i le tui. O le mea lea e faalogo loa le tamaititi o le a sau le tui, alu loa i le atoa aua ua uma ona faafefe e tatou, matua. Ua faaaoga le tui lea puipuia o le mea lelei ua avea ma mea e taufaafefe e faafefe ai latou fanau. O lea la ua oo i le taimi ua manaomia ai le faatino o le galuega lea, a ua leai se tamaititi e toe manao i se tui ua faigata. Ia ma oso ai foi le alofa valevalenoa o le tina ia

faapea, ia tuu ia si au tama au le tuia leaga o lea e fefe se i tui i lea vайасо. Ia o mea la faapena lea e tatou te le o tilotilo i ai o lo o tutupu i totonu o le tatou lotoifale, o lea e anoanoai mafuaaga o lea ua mafua ai ona faigata i o tatou tagata ona talia le tui. Ia a o le molimau lena a lenei Matagaluega e tusa ai, o lo o faaauau pea la le tatou mob-up lea foi sa fai i le vайасо nei, ia atonu ua lata mai se taimi o le a faaoooo ai i matafale uma lava le galuega a lenei Matagaluega o lo o faaauau pea, se i faasopolia uma ua leai se isi e toe mauaona taofi loa lea. Ma o lenei galuega, o lea e faatino i seleni ma fesoasoani ia, lea e aumai ia tatou paaga. O lea o le a faauma atu.

Tofa Olo Fiti Afoa Vaai: O se fesili pupuu lava lea. O le taimi ao Minisita mo le Soifua Maloloina, o le a se galuega na fai i tamaiti ia e fefefe e o e tui? Ua fai si umi o Minisita le Afioga i le Minisita nei....

Afioga Hon Tuitama Talalelei Tuitama: O lea ou te tu pea ona o lea ou te le i faalogo atu o ave sau faatagaga i le faauilavea.

FOFOGA FETALAI: Ua ou manatu e le tatau foi ona e tali i ai.

Afioga Hon Tuitama Talalelei Tuitama: Faafetai. Ua maea lau afioga i le Fofoga Fetalai.

FOFOGA FETALAI: E leai se isi faaopoopoga ae lafo ia i le sui usufono mo Faleata.

Afioga Alaiasa Muagututia Moefaaououo Malagaitutogiai Sepulona Moananu: Faafetai mo le avanoa i lau Afioga i le Fofoga Fetalai. O lea ua tatou talanoa i le Atua ma le faamoemoe e sao lelei le saunoaga e pei ona aumai. Aua e tele ituaiga Atua lea e talitonu i ai tagata. A o le Atua lea ou te talanoa atu ai, o le Atua so o se tagata e talitonu e usitai i le Taitai. Aua e tele isi ituaiga tagata ia e tautau mai, e faatuatua i le Atua ae tetee i le Taitai. O au la ma lou talitonuga so o se tagata e alu i le Atua, e faia uma lava le mea atoa lea. E faalogo i Taitai, afai mai e tui, tui. Ioe, a fai mai e o e tui, tui. Silasila foi lau Afioga, mai le tolu vайасо lea na logo mai ai le misela, sa i ai ma lape. O le 19 tausaga i lalo e le tuia, o le 35 tina agai i lalo e le tuia. O le taimi la lea ua amata ona panic tagata, e na o le pau lava lau tala na fai i tagata o le matou nuu, o e tatalo i le Atua. Ina ua faatoa alu atu nei le compulsory, ou fai atu loa e usitai e o e tui uma. A o le taimi atoa lea, le tolu vайасо lea, o le Atua lea na sulu i ai. O lea ua ou talitonu ai, se o la e fesoasoani mai ia i tatou i le mea lea e faaletonu ai le folaua a lo tatou atunuu. Aua tatou te talanoa nei i le mafuaaga o le mai, o la e i le Tusi Paia, o la e i ai le taimi o Aikupito, o mai paupaua ma le mai fulafula, o mai na ua leva ona aumai e le Atua pe a faalogogata le tagata ia te Ia.

Se i taatia atu i lau Afioga, ae o le a faaauau le lauga a le sui mamalu.

Susuga Hon Tuilaepa Auelua Fatialofa Lupesoloai Lolofietele Neioti Aiono Galumalemana Dr. sailele Malielegaoi: E lelei lava le mea o le fetufaaiga faapenei, aua o le fesili tonu lava lea, o lea e aumai e le sui usufono, na aumai faamalamalama lelei mai lava e le soifua maloloina. O le a ave le faamuamua i fanau laiti ia, ia vave ona tui, o i latou ia e pito valuable, e amata muamua i ina le galuega ona faasolosolo atu ai lea i le vaega matutua. O lea la na outou silafia, o tamaiti lava ia na pito sili atu na vave ona maliliu. Ae na oo mai foi faamatalaga i le laulauvavale o le aumatutua ia ua o atu, ae o lea e tau taofi, se i ave le faamuamua i fanau laiti ia e pitosili ona vave ona aafia i le faamai. E i ai le asiasiga na matou o taamilo, matou o Minisita, taamilo i tua se i o matou vaavaai aua o mea ia e tatau ona fai e Minisita. Se i o matou vaavaai ma lotelote mai ia, se i o matou lagona le tiga. Na matou iloa ai matua o lo o i ai. Na o matou talatalanoa i ai i mai ia. O le tulaga lena na o matou iloa atili ai, le mea lea o lo o tupu. Matou te o atu, o la e tau faamalie mai le isi tagata matua, o lea e ave le faamuamua ae le mai, ae na alu atu e fai lona tui. O lea e faapea mai le.....ou fesili atu, o le a le mea a le alii matua la e tuu mai o? O la se i tau faamalie o lea e ave muamua le faamuamua i tamaiti ia laiti. E pei o le tulaga lena, e i ai foi le faatofalaiga ma le faautautaga mamao o lo o i ai ia i latou e faafeoa mea ia. E pau lava lea,,,,,o le uiga lena o le tatou atunu. E alu atu loa le isi ua faalii, ma faapea ai ua faatamala ia i latou o alii ma tamaitai fomai o lo o faafeagai ma mea ia. Ae o lea e ave le faamuamua i fanau, aua a tilotilo i ai, masalo o le ova i le 80 90% i latou ia na maliliu. O tamaiti la ia e ave i ai le faamuamua. A o le taimi foi lena ua talafeagai lelei ma tui ia e i totonu o le Soifua Maloloina, ae o la ua uma ona fesootai ai foi ma Faalapotopotoga i fafo, o lea ua faalele mai isi mea. Ona faagulosolo mai lava lea ma talafeagai lelei le faasologa o tatou polokalame. E amata atu i e o pitosili ona lamatia, faasolosolo atu ai lava ia i tatou matutua, o lea e lava le tatou **immunity**. E faatatau mo le faafeagai ai, ma le taua o lo o fai ma siama lea e osofaia i tatou.

FOFOGA FETALAI: Malo faafetai, o lea ua manino auofala i le saunoaga a le Palemia. E aoga foi le taulagalaga mai o sui usufono, aua e manino ai nisi o mea faapena. E le gata o le tatou Palestene, ae o le faafogofa mai a Samoa ma le atunu. Mo i latou foi,.....e le o manino ia i latou le tulaga.....e i ai lava le tagata e fia malamalama ae i ai foi le tagata o la e malamalama ae le fia malamalama. Ae aoga e taua tele saunoaga a sui mamalu. E taua foi le saunoaga a le Minisita e pei ona saunoa nei.

Ona ou manatu lea, malie le sui usufono mo Faleata, o lea ua tatou toai taunu lava i le tulaga o le faamaninoga o le misela. Aua e tatau lava ona faamamafa i ai le tatou talanoa, leaga o la e tapuai mai ma faafogofa mai Samoa. O i inei e faaaoga ai lau, ma le faamaoniga o mea sa tutupu, ma le

tulaga i le taunuuga o lo o taunu i ai ia sailiga o le fofo ina ia mautu le aveesea o lenei faamai mai le atunuu.

O le mea lea, ou te fautuina le sui usufono mo Faleata i Sasa, faauma maia lau saunoaga aua lou itumalo.

Afioga Sulamanaia Fetaiai Tauiliili Tuivasa (Vaimauga Sisifo): Lau Afioga i le Fofoga Fetalai e tulai atu e fia faasaoina o le taimi o Faleata, e le faalavelaveina foi lenei itumalo i le lauga matagofie a Faleata. Ae fesoasoani atu i le mataupu, e pei o lea ua maua le tulaga i le tulai mai o le Minisita o Tina ma Tamaitai i le mea lea o le **mop**, e pei ona saunoa foi le Taitai i lenei taeao. Ua matua fia faafogofa lenei Maota aemaise o le atunuu i le lauga a Faleata, i le faamalamalamaina o le misela. E faaluina foi e lenei sui usufono. Ae o lea ua maua i lenei taeao ua tali fuaitau foi le Minisita o Tina ma Tamaitai i le latou polokalame lea o le **mop**. E pei e avatu e lou sui usufono, e lagona ai lou faanoanoa, ona o lea tou te o e faatino le mop ae tou te le o ma ni tui. E pei o le agaga lea o lea e avatu ai, maumau e pe ana faapea o lea tou te o e fai le follow up lea, ae o la tou te o ma tui. O le a la le aoga o le tou polokalame, na o le tou o mai tuu, ae le o atu le Matagaluega o le Soifua maloloina. E pei la o le tatalo atu i le Afioga i le Minisita, ua faalogologo lava ma le totoa i lenei taeao o lo o ua talanoa le Matagaluega i le lauga faataupou a Faleata, ou vaai atu i le Minisita o le Soifua Maloloina, e na o le punou lava.

E pei o le agaga lena, ta te fai alofa foi ona o le Minisita o le Soifua maloloina lea e i ai le misela. O le uiga la o lau tala, pe mafai ona o le Matagaluega lea o Tina ma Tamaitai, i le mop lea, e o e follow up i le latou Matagaluega ma ave tui. Aua e leai se aoga e o ai e ave le follow up ae...

Susuga Hon Tuilaepa Auelua Fatialofa Lupesoloai Lolofietele Neioti Aiono Galumalemana Dr. sailele Malielegaoi: Lau Afioga i le Fofoga Fetalai, se i fai atu lava si mea sia. Leaga o le mataupu lea o le mataupu tau i faiga faavae a lo tatou Malo. E tatau la ona ou avatua faiga faavae. O le agaga lea o le Faigamalo lenei, o le galulue faatasi. O le galulue faatasi ma faaaoga le common-sense, le faautautaga tatau. O le Matagaluega lea, o lea e i ai sui o le Malo, sui tamaitai ma sui alii. O lona uiga, o pulenuu, o lea ua see ese ma le faaigoa o latou ia o pulenuu. O lea foi na aumai le teuteuga i inei, leaga o nisi o i latou ua fia pule i le nuu. A o i latou o tagata faigaluega a le Malo, o le latou galuega o le fesootai lea ma le Matagaluega lea e i lalo o le Minisita, e gafa ma le lotoifale. Ona avatu ai lea o faiga faavae a lo tatou Malo. O lea foi ua uma ona maioio le isi uiga lea sa saunoa manino i ai le Minisita i mea ia o tui. E tau loa le tui fefefe, e oo lava i isi tina e fefefe, o le ala lena o lea e faaaoga ai le isi metotia lea, o le faafeiloai o tina o nuu i le fono ma alu ai loa le latou polokalame.

I le tulaga i le faautautaga tatau ma le soona faaaoga o tupe a le malo faaletatau. E tatau ona alu pea le latou polokalame, e faigofie ai ona

mataitu uiga ia, ma latou maua ai le aofai, ona faatoa logo loa lea, i le vaega lea a le falemai. Ona o atu sao loa lea o tagata e faatinoina le mea lea, o lea ua maua uma o latou igoa. I le faautautaga tatau lau Afioga i le Fofoga Fatalai. E leai se mea o le a soona ai le vaega lea ma se vaega toatele, ae o atu e leai ni tagata e maua. Aisea? O la foi ua o mai ma le au tui psychological impact, e fuafua tatau. Lau Afioga i le Fofoga Fatalai, o se toe faaopoopo atu lena.

Afioga Hon Tuitama Talalelei Tuitama: O lea ua saunoa atu le Taitai o le Malo, ao si vailiu lava lea e faamanino lelei. E sao lelei le saunoaga a le sui, e tasi lea sui usufono e mataala o le tatou Maota, e manaia foi ana tuualalo. Ae na o le faamalamalamaga o le vailiu lea. E amata le **operation** a le Matagaluega, e pei lava ona saunoa le Palemia, e i ai faiga faavae. O lo o i ai le faiga faavae ua uma ona fuafuaina mo le **address** ina o le emergency lea sa feagai ma tatou, le misela. O lea la sa fai ai le komiti, faavae ai le komiti e tau o le **NEOC**, National Emergency Operation Committee. O lea e i ai uma Ofisa Sili o Pulega o Matagaluega i le Komiti lea. O faiga faavae na na faataoto mai, e o matou e saili, ona ave lea o le lisi i le NEOC, manatua foi e manaomia statistics, ina ia faamaumau mea uma faapena, ona logo lea o le Matagaluega o le Soifua Maloloina e tau i ai tagata nei. Ona alu alu ai lea ua dissolve le NEOC, ona lipoti sao loa lea o matou i le Matagaluega o le Soifua Maloloina. E tasi lea matafaioi, e sao ai le saunoaga a le sui usufono, o lea lava sa ou tulituliloa le Matagaluega, faafesootai le Matagaluega o le Sofua maloloina, pe ua tui i latou ia na avatu. Ae i ai le isi vaega lea e misi, i le faitau a le sui mamalu, o le galuega lea e tau o le **psycho social**, o le vaega lea e tele ina misi i emergencies ia sa tutupu i totonu o Samoa. E pei o le tsunami e pe i o valelia. E pei o afa tetele ia, o lea e aafia ai le soifua o le tagata, o le tele o **psychological effect** i tagata. O le mea lea, o le **dark area** lea, la e iloa mai e fafo, sa le vaai mamafa i ai tatou i futia ua sola. E talu la ona tulai mai lea, tu malosi mai Faalapotopotoga i fafo, aemaise o le WHO, UNDP, UNICEF, ua vaai i le impact o le mea lenei, ua tele tagata ua maliliu i le faamai, ua vaai i le aafiaga o mafaufau o tagata, **psychosocial effect**, i tagata o le atunu lea na matua tele le fesaosoani e sau mai vaega ia. Tasi la lea galuega, o le galuega lena e fai e le falemai. O lo o i ai le komiti faapitoa lava o le psycho social committee lea e galulue ai le soifua maloloina, o le latou matafaioi lea e aafia ai le mafaufau ma le psychological aspect o mea ia o emergencies. A o lea foi sa galulue fesoasoani i ai matou aua sa galulue faatasi ma le Red Cross ma isi non government organisations lea sa galulue faatasi ma le Matagaluega e o la e faatalanoa tagata ia, aisea le mea ua e musu ai e tui? O le a le mafuaaga o lou musu e tui? Ia ona talatalanoa lea i ai i mafuaaga ia, ma fai ai le galuega lea, le galuega lea e faatoofilemu ai ma faamalamalama aua o le tele o isi tagata na e le o oo i ai le service lea. E matalua la le galuega lea sa

fai e le Matagaluega, e le gata ina saili latou ae talatalanoa foi i ai pe aisea ua ala ai ona le tuia latou. Se a faafaigata ma faafitauli. Ia o le tulaga a lea, o le tele lava o latou e fefefe, ona o psychological effect o mea nei o emergencies, o le dark area lena e le o address ina e le tele o atunuu ma le tele o faalavelave ia e tutupu. O lea la ua agai i ai le tatou Malo ua matua le tatou Malo ua silasila uma i tulaga uma e aafia ai le soifua e le gata i le tino faapea foi le mafaufau ma le agaga. Ia manuia le Fono.

FOFOGA FETALAI: Ia, se i tulai mai le sui usufono mo Safata e faaiu mai. Ia, se i tulai mai lava le Minisita o le Soifua Maloloina.

Tofa Faimalotoa Kika Iemaima Stowers (Minisita mo le Soifua Maloloina): Faafetai i lau Afioga i le Fofoga Fatalai mo le avanoa. Ua ou tulai atu i lenei taimi o lea sa taua e le sui usufono mo Vaimauga Sasae o lo o faapena ona na o le punou o le Minisita mo le Soifua Maloloina. Ia ou te le ma e tau atu, e le mafai ona ou faafinai e momoli lau faafetai i le Minisita Lagolago aua o ia o le fomai. I le faafogfa a Samoa i le taimi na tatou i ai i le tiga o le misela, tele le fesoasoani a Salausa sa faapena ona malamalamala ai le mamalu o le atunuu. So, o le ala lena e le mafai ona ou tulai e faamalamalamala se tulaga ona e le o au o se fomai, a o lea ua ou faatalitali i le taimi e tali atu ai foi faafesili na tuu mai.

Ae o le a faapena ona avatu se manatu i le taimi nei, o futia ua sola, ua sola, ua tatou iloa lapse ua tatou iloa pe afai na i ai sasi, o sese ma tulaga faapena. A o le focus ua tilotilo i ai le Matagaluega i le taimi lenei, tatou o loa e faatino, le toe i ai se nofoai, tatou savavali i luma e faatino mea ua o tatou iloa, na le mafai ona tatou manatu mamafa i ai i le taimi ua sola, ae o le aaooga ma le mea ua tatou maua mai ai, o le taulai lena lea a le Matagaluega, o lea e pei foi ona fesiligia ma ou tulai atu i letaimi ua sola fuafuaga faataatitia alualumamao e le aoga ona toe faataatitia a o le mea taua lea ua taulai i ai, tatou tulai, faafetai, tatou galulue faatasi. O tatou uma lava e i ai le tatou responsibility i le mea lenei. E le tuuaia o ai na sasi, o ai e sese. O lea ua tatou iloa le aaooga, ua tatou iloa lesona na tatou maua mai i i, o le taulai lena o lea ua tilotilo i ai le Matagaluega, fai le mea ua tatau ona fai ina ia mautinoa e le toe tupu se mea faapea i le lumanae e pei ona faamalamalamaga. E tele isi faamai ia, e 16 ea faamai. O le tele ia o le galuega o le a faapena ona palasi atu i ai le Matagaluega, o lea ua amata le tausaga ua tatau ona amata pe a maea atu le Fono lenei ua maea ona fono, faataatitia ma tulaga eseese. O tui uma nei ua tatau ona update, e tai pei foi ona i ai le booklet lea na fesiligia e nisi o sui usufono. E le mafai ona atoatoa le booklet lea vagana ua update uma isi tui ia e taatitia mai nei. E tele se tuge e alu i le booklet lea. Oka oka e. E pei foi ona fesiligia i le isi taimi, o lea ua i ai le maliega ona o lea ua tatou i ai i le misela, faaaoga le card o le misela i le Tulafono ua faapena ona pasia ma faamaonia i le aso 1

o Ianuari lenei mo le enrollment o tamaiti aoga, ae le mafai ona fai le booklet lea i lenei taimi, aua o le booklet lea etatau ona atoatoa uma lava i ai tui ma faamai ia e le i taitai ona...

Ia e pei o lata tulai atu lena i lenei itula, o lo o ou faalogologo ma le totoa ma faapena ona fika le mafaufau mo le agai i luma. O mea ua tuanai, ua tatou iloa pe a fai o le sao ma le sese, ae faafetai i le Atua ua vave ona tali mai i a tatou tatalo faitele, le tapuaiga a Samoa ma le aufaitatalo ma fesoasoani eseese ua faapena ona vave ona muta le taimi sa feagai ai le atunuu ma tiga o le misela. Ma le agaga faafetai.

FOFOGA FETALAI: Malo faafetai. Se i toe tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga so o se mea lava e i ai le amataga e i ai foi le faaiuga. E i ai le talamea e i ai foi le taualuga. O le taualuga o nei mea uma lava na tutupu, ma o le fofo tumau lena i le agai atu i le lumanai, o le Tulafono lea na aumai i le Maota lenei mo le tuiga o fanau, o le fofo tumau lena ona o lea e tau fesili nisi pe faapefea la le agai i luma, e le o mafaufau i le mea lea na fai e le Malo. O le fofo tumau lena mo le agai atu i le lumanai, o le Tulafono lea na pasi atu i totonu o le Maota lenei. Afai na i ai se isi na io le malamalama i le maoae o le faatopetope mai o le Tulafono i inei, ia o lea la ua ou tau atua, o le agaga lena o le Kapaneta ma le Faigamalo lenei, fai loa se fofo tumau, fofo tumau o le faamalosia o le tui. Ia o le soosootaga ma le faaiuga lena o mea uma.

FOFOGA FETALAI: Malo faafetai. Ia, ou te tapa lau Afioga i le sui usufono mo Faleata Sasae, faaiu maia lau saunoaga, ua tatou see ese mai le mataupu lea o lea ua maea ona fai le aotolega o le saunoaga a le Palemia, ua faapea foi ona saunoa le Minisita o le Soifua Maloloina aemaise foi le Minisita mo Tina ma Tamaitai ma sui o le Malo ma tamaitai.

Afioga SALAUSA JOHN AH CHING: Faafetai mo le avanoa. Ia o le usitai lava le mea sili lea. E ala foi ona umi ona ou tautala i le misela o lou usitai i le Maota, na ala ai ona umi, a o au na ou see ese. E le i i ai foi se manatu faapea e fai se semina, e leai o lou tali atu i faauilavea a sui usufono na tulai mai na ala ai ona faapena. Ae le faapea o se semina ua faia e lenei sui usufono e tau sue ai se lanu, leai o lea lava e manaia lou lanu. Ae faafetai tele atu i le fesoasoani mai a le Afioga i le Minisita mo le Soifua Maloloina ma le Minisita mo Tina ma Tamaitai.

Ia, o le a ou see atu loa i le matou itumalo. Se ua ala foi ona amata le talanoaga i le misela, e leai lava se sui usufono na tulai mai e le i muamua lava talanoa i le misela. O le mea foi lea ua ou tulai atu ai au ou talanoa foi au i le misela.

FOFOGA FETALAI: Faaiu mai le saunoaga a le sui usufono ua maea lou taimi.

Afioga SALAUSA JOHN AH CHING: Ae o le a avea le usitai ma mea o le a faasala ai. O faiga faavae ua suia ai nei le faiga faavae o faiga palota a le atunu o lea ua palota le tagata i le mea e nofo ai, ma o i lea o le a amata ona manino mai ai le aofai o tagata i lea itumalo ma lea itumalo e tatau ona tausi e le sui usufono. Ma o suiga o ia faiga faavae malolosi ma ogaoga ma taua, o lona uiga e tatau foi ona sui ai ma isi faiga faavae e mulimuli mai. O se manatu e faatupu manatu i le Afioga i le Palemia ma lenei Palestina, pe le ua tatau ona toe iloilo i le faiga faavae o le faasoasoaina o le paketi a le tatou Malo mai lea tausaga i lea tausaga, o tagata i totonu o lea itumalo ma lea itumalo. E pei la ona outou faafofoga i le po anapo sa ou taua le itumalo lenei o Faleata Nu.1 i faamaumauga i le 2016 e 13,190 le aofai o tagata. Ia o tagata uma na sa tatau ona tausi e le sui usufono e toatas.

O le isi meao lo o manaomia e le itumalo lenei, o auala. Masalo na o le pau lea o le mea e ave i ai le faamuamua a lenei sui usufono ae tuu nisi mea o le atinae se i sau le isi Paeaiga, a o auala. Faafetai i le Afioga i le Minisita mo Galuega o lea ua uma ona faataatitia le auala galue o si ou nuu i Vaimoso i Lanumea, faapea foi le isi fuafuaga i Moamoa Fou agai mai i i le vilimaa ona o tulaga na. A o le tulaga lea na molimaunina nei i le tuiga na alu, i Moamoa lava ia, e ese ma le faaletonu o auala i Moamoa. O tatou vans sa feoai ai i ina, na alu alu muta mai le mea e mafai ona laasia e le van. Ona o atu lea o pikiapu four wheel drives faaaau le tuiga i Moamoa Mauga ma Moamoa Fou ona ua le mafai ua maualalalo ma maseesee le auala e le gafatia e le van. Ia o auala lava o lenei itumalo. O le mea lea ua ou faafetai i lena vайaso ua tuanai atu i le tele o auala galue sa tatalaina i Savaii. O le mea foi lea ua manatu i ai lenei sui usufono, ia pe le ua tatau ona toe fesuiai foi a tatou mea. O le mea e lelei i Savaii, e lelei foi i Faleata Nu.1. ua lelei uma auala galue o Savaii, a o Faleata Nu.1 lea o lo o toomaga mai i ai ma saili manuia mai i ai le toatele o le atunu faapea foi letoatele o le mamalu o lenei maota o lo o alaala i Faleata Nu.1, o mea ia e tatau ona faaleleia.

Ia, o le isi vaega mulimuli lea lau Afioga i le Fofoga Fetalai, se e i ai lava le filosofia lea e faavae i ai Malo Temokarasi, texation without representation. Ia, e pei e faapena se lagona ona o le tulaga lava i tatou faiga palota ua i ai nei ma le aofai o tagata i lea itumalo ma lea itumalo. O lea e i ai le representation a Faleata Nu.1, ae a fua at i le aofai o tagata, pei lava ua le talafeagai ua laitiiti e le fetau, ae se i toe silasila i ai. Na ona faatupu manatu. Se i silasila ifo pe le tatau ona toe faaopoopo se sui usufono mo Faleata Nu.1 ina ia tau kava ai le toatele o le aofai o tagata. A faapea o le a le finagalo o le Atua i le isi Paeaiga fou i le sui usufono e tulai

mai i lenei itumalo, ou te le iloa pe faapefea ona toe faataunu se oo, o le matua toatele o le itumalo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai ina ne i te i ua toe sosolo mai ai se isi manatu e toe faaopoopo ni sui usufono, ua leai se mea faapena, o lea lava ua alu tatou i le one man one vote. O lea faatoa alu tatou i le tulaga e tatau ona i ai, e tasi lava le tagata tasi lana palota, tasi le itumalo, tasi le sui usufono. O lona uiga la, aua e te popole. A toatele lou itumalo, ia ona uma ane lea ua le fa Moamoa a ua ono Moamoa. E faapena. Na o sina faataitaiga ona feseetai lea o itumalo e tatou te alu ai i faiga masani ina ia tali atu ai i le faitauaofai o tagata. A o le faiga lea na tatou sau ai o le toatele ane loa o tagata faaopoopo le sui, e le toe alu tatou i le mea lena lea e alu uma ai lava le lalolagi e temokarasi, lea foi na temokarasi atu ai ma tatou. O le fesuiaiga e fai e fesuiai i le tilotilo i le toe fetuunai o nuu pei o le mea lea e i ai tatou i le taimi nei. Afai o i ai se tau le paleni, o le mea lena e toe fai foi aua e le faapea e fai ona muta ai lea. E faifaipea le mea lea i le agai atu i le lumanai ia tau faapalenai pea. O le faiga muamua e i ai lava sina faigata ona faapalenitutusa fuainumera ae sao lelei le mea lea e te saunoa ai, e tatau lava ona i ai se paleni o le toatele o tagata ma latou sui i totonu o le Palemene lenei. A o le tulaga la lena ne i te i ua le maua atoatoa i le taimi sa aumai ai le Tulafono lenei, o tatou lea ua alu i le Tulafono o le tasi o le tagata tasi lana palota, tasi le itumalo tasi le sui. A i ai la ni fesuiaiga i le aofai o tagata, e fai le fesuiaiga lena i le toe fetuunai o nuu o le itumalo.

FOFOGA FETALAI: Ia, ua manino faiga faavae o lea ua fuafuaina e le Malo. Tulai mai le sui usufono e faaiu mai le saunoaga.

Afioga SALAUSA JOHN AH CHING: Faafetai tele i le Afioga i le Palemia, o lea la ua maua le tali o lea foi tulaga. O lona uiga la, ia faapalenitutusa fua fua nei ia matou auala galue. Ma o le itumalo foi lenei o latou auala galue ia, aua foi o le workforce lea o i inei i Apia lea e alaala i i i le itumalo lenei. O auala galue la ia, o auala i le va i fale e omai ai le aufaigaluega. O taavale foi ia o lo o faaaoga, o taavale laiti e maulalalo e le mafai ona gafatia i auala ia o lo o i ai. E tagiuu lava le mafaufau...

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le a fai uma lava mea na. Ae aua e te popole. Vaai foi i ai o lea

ua e faatusa Savaii i auala ia na matou o fai, ona faapaia ma auala o lou itumalo? Ia o le auala lea e alu i le airport lea e oso atu i totonu o lou itumalo, o lou auala galue lena. O fea la se auala e matua maoae toeitiiti miliona ma miliona le tau, a o auala uma a ia e i totonu o itumalo o outou, e fai uma lava faamanaia. Ae aupito sili atu lava auala o lou itumalo i auala ia na matou o faapaia i Savaii.

Afioga SALAUSA JOHN AH CHING: Ia, o le a faauma atu. O auala vaifale la ia e talosaga atu ai faamolemole.

Ia, ona faaiu atu lea o se lauga i lenei aso, o le matua lava na amata mai ai lenei lauga i le po anapo, o le avega e tausoa, ma o le mea foi lena e fia avatu le faamalo ma le faafetai, e le faapito i se... ae faalauaitele i le Afioga i le Palemia, le Sui Palemia faapea foi Afioga i Minisita i galuega fai o lenei tausaga ua tea atu ma le galuega o le a sagai atu ai i le tatou tausaga mulimuli lenei. Faafetai atu i Matagaluega uma faapea Ofisa Sili o Pulega o Matagaluega ma Faalapotopotoga Tumaoti a le Malo mo le avega sa tausoa mai ia tausaga ua tuanai atu. O le manatu ia tatou faaaaua pe a le tausoaina o lenei avega, ia faapena foi se manatu i le atunu, tatou tausoa faatasi le tatou avega. E te pipii lava po o fea le itu o le ama e te pipii i ai, ia tausoa ma amo se mamafa. Aua ne i na o le pipii ina ia vaai atu o la e pipii ae le o amoa sau mamafa. E tatau lava ona amo sau mamafa ona tausoa faatasi lea o le tatou avega. E avatu foi le faafetai i le aufailotu i susuga i faafeagaiga ma le au ositaulaga mo la outou galuega o lo o manuia ai Samoa. Ma e matauina lava e lenei sui usufono, e pei lava ua faimea faapito lava le Atua ia Samoa i le tele o faalavelave ma tulaga e utlai mai. Ae ou te manatu e le i tupu fua ia mea, e le tupu fua, leaga o Samoa e tulivae i le taeao, tulivae i le afiafi, tulivai i aso Sa uma e ave le faamanu ma le faafetai i le Atua. O uiga lava ia o le faataua i le tatou aganuu o le tautua i le matai e faapena foi ona tali mai le matai. E faapena foi i le tatou tautua lotu i le tatou Atua e toatasi e le misi le tali mai o le tatou Tapaaau Sili i le Lagi. O le mea lea e faafetai atu ai i le tatou aufailotu i lo outou nofo tatalo, ae alofa ia se i fai ma se alofa foi i le lafu mamoe, le aufailotu, ia aloaloese mai faaososoga o le agaga leaga.

A o lenei aso, ua faafetai tele mo le avanoa. Ou te faafetai atu i lou itumalo o Faleata i Sasae i le matou nuu i Vaimoso i le mea o lo o Susu ai Mataia le Tama a le Hale, afio ai Usoalii ma le Matua ia Patauave, alaalatai Igoamatua ia Une ma Manuleleua, susu foi Nofoatama ma le Matua ia Toala ma Tiufea ma le malae. E faapea foi si ou nuu i Lepea e afio ai le Faumuina le Tupufia, Usoalii ma Tamapaa, lo la vaa seelua ia Aii ma Vaitagutu ae faapea le Saofaiga ma Atua. Aemaise le loaloa o lenei itumalo i tupu ma ee o le atunu o lo o alaala ai, faletua ma tausi, saoao ma tamaitai ma le malosi o le itumalo. Faafetai i la outou tapuaiga. Malo faafetai.

FOFOGA FETALAI: Malo faafetai. E le tau faafuluina pe tau laeia i se upu le toga lelei aua le saunoaga a le sui usufono. Ua malie foi taliga e faalogologo, malo faafetai. Ia ua faafogoga mai Samoa, e le gata i le faapupulaga o mataupu sa mafatia ai Samoa, a ua e ta foi i Utumaau aua le taiala tatou te soifua ma ola ai ae faapena ona faasaoina ai i tatou e lo tatou Atua.

Ma e talu ai ona o lea ua uma ona faataoto le alafua mo le...

Afioga Amituanai Fagaivalu Kenrick Samu (Aleipata Itupa i Luga): Ou te tulai atu ma le ava tele se i taumafai atu ai foi se sao puupuu.

FOFOGA FETALAI: Ia se i fai se lua faatau po o ai o oulua e...

Afioga Afoa Amituanai Faleulu Mauli (Palauli Sisifo): Amituanai, se i tuu mai le avanoa ia Afoa lea mai Palauli Sisifo se i fai atu sana tala...

Afioga Alaiasa Muagututia Moefaaouou Malagaitutogiai Sepulona Moananu: Lau Afioga i le Fofoga Fatalai lafo atu ia le faaaloalo i le lauga faataupou a Palauli Sisifo. Ma le agaga faaaloalo.

FOFOGA FETALAI: Se o mea faapea, o le aganuu e tiu ai le tatou Palemene. Ioe. Malo faafetai Lufilufi. E leai o lou tiute lena i lena itu o le malu. E le selu atu. Malie lau Afioga i le sui usufono mamalu o lo o tulai mai, se i ave ia le faaaloalo ia Palauli Sisifo e saunoa ai e tusa ai o le mataupu, aua o lenei Tala Faatatau Faaopoopo o le Tupe, o le tala lava sa outou soalaupuleina e Minisita foi o le Kapaneta faapea foi...

Afioga Amituanai Fagaivalu Kenrick Samu: E usitai lava i lau Afioga, ae a silasila leaga e te le i auai i le po anapo, ua leva ona tuu le avanoa i le la itu. Ae pei o le taeao nei, pei o le itu lenei se i taumafai atu ai foi se... Pei o le ala lea o le taumafai atu, a o la e ua toe taumafai mai...

FOFOGA FETALAI: Ia, malie ia o lea foi ua see le vaa o Lufilufi aua le faaaloaloga i lea itu o le...

Afioga AFOA AMITUANAI FALEULU MAULI: Faafetai atu i lau Afioga i le Fofoga Fatalai. Sa ou tu atu e tuu mai lau faatagaga faapea foi lau faamanuiaga i le lauga a Palauli Sisifo po o lea ua tau nei o Palauli Nu.1 ae le i faaiuina saunoaga sa fuafua mo le aso i le Taitaifono ma le Sui Taitaifono o le Komiti o Tupe. Ae faafetai mo le avanoa i lau Afioga o le a amata atu le lauga a Palauli Sisifo.

Faafetai i lau Afioga Amituanai mo le avanoa i lou uso. E le faagaloina lava le ta malaga i Pakistan lea na ta o ai. Manaia tele le atunu. Faafetai atu i lau Afioga i le Fofoga Fatalai i lenei taeao matagofie i le alofa o le

Matai Sili ua ia taitai mai ai lo outou soifua ma lo tatou ola i le afio o lau Afioga faapea le Afioga i le Palemia o le Taitai o le atunuu. Afio lau Afioga i le Sui Palemia ma le mamalu o le Kapaneta...

Afioga Amituanai Fagaivalu Kenrick Samu: Lau Afioga i le Fofoga Fatalai, o lea ou te vaavaai atu o la e faitau mai le lauga a le sui usufono.

Afioga AFOA AMITUANAI FALEULU MAULI: Faapea sui usufono o le Palestine, le Failautusi o le Matagaluega o le Fono ma le aufaigaluega, faapea Ofisa Sili Pulega o Matagaluega ma Faalapotopotoga Tumaoti ua tatou faatasi ai nei i le Fonousu a Samoa.

E faatalofa atu foi i le paia ma le mamalu o Samoa o lo o faafogoa tapuai mai i lenei taeao aemaise si ou itumalo faapelepeleina o Palauli Nu.1. E ofo alofa atu ai i le paia o Salevalasi ma le Matua, le Falefa ma Faigata ma lau Tautalaga Faiumu ma Salemuliaga. E ofo alofa atu foi i le paia i Aiga, Alosina ma Sa Amituanai, alii o paepae, le Matua ia Tuato ma Tolovaa ma Salemuliaga. Ou te ofo alofa atu foi ia Letelemaana ma Leaupepe, Alo o Lilomaiava, le Falelua ma le Gagaemalae. Ou te ofo alofa atu foi i Tauavamea ma le Uso, Alo o Lilomaiava ma le Ituala Mavae, le Ailaoa ma le Gagaemalae. Ou te ofo alofa atu foi ia Faatupuinati ma Tuauato, le Falesefulu o Lilomaiava, aemaise e na tai ma Gagaemalae.

Ou te faatalofa atu foi i faafeagaiga taulagi i fatafitaulaga e fia i Palauli i Sisifo ma Samoa o lo o asuina le vai o le ola aua se manuia mo Samoa. Faafetai ma faamalo tatalo ma le tapuaiga ma le lagolago malosi i le tatou Malo.

E mua le faafetai i le Tapaau i le lagi ina ua tatou sao mai i nisi o faafitauli ua mou malie atu, ona o le faamai sa tatou feagai aii masina ua tuanai atu, ma e momoli atu ai le faafetai a lenei itumalo o Palauli Sisifo Nu.1 i lau Afioga i le Palestina ma le Kapaneta, aemaise le Minisita o le Matagaluega o le Soifua Maloloina ae tainane le Ofisa Sili o Pulega ma le aufaigaluega o le Matagaluega ae faapea o tatou paaga ma malo ma faalapotopotoga mai fafo i le taupati mai i le taimi pogisa ma le fita sa oo i ai si o tatou atunuu pele. Ia faamaise le Atua pulepuletetele i aiga faanoanoa ona o le amia o pelega i fanau ma uso ma tina.

Ona i ai lea o le manatu e fia faaalia i le mataupu ua taatia nei i le Fonousu a Samoa e fesoasoani atu ai i le tatou galuega faifaatasi. E i ai le mataupu taua lea sa taua i le matou fonotaga foi ma Komiti Faa-Palestine o Tupe e uiga i mea nei o TV Bingo. Ma e i ai se tusi lea sa ou tusia ia Oketopa aso 4, 2018, ae sa le mafai ona tuuina atu ona sa pisi lava le Afioga i le Minisita i le tele o ona tiute e pei o le vaalele lea sa toe faafoi ma le taunuu. Ia peiseai o le Aso 12 Tesema i le tausaga tuanai, ia na... ao vevesi tatou i le misela, sa pei ai se musumusuga a le Agaga Paia ia te au, e tatau ona faataunu ia manaoga ma le tusi, ina ia puipuia ai a tatou fanau, i le mala o le a tupu talu nei taaloga faitupe.

Ma o le a ou faitauina atu ia vaega o le tusi lea, E tusa ai ma le fautuaga a le Fofoga Fetalai i lana tusi i le Aso 14 o Setema 2018, i le Taitaifono i le Komiti o Tupe Maua ma Tupe Totogi i lalo o le Tulafono Tumau 62 i le mataupu e pei ona taua i luga, ou te fia fesili mo le lautele, ua popole ma atugalu le afaina tele o a latou fanau.

Afioga Hon Lautafi Fio Selafi Purcell (Minisita mo Pisinisi, Alamanuia ma Leipa): Lau Afioga i le Fofoga Fetalai....

FOFOGA FETALAI: Malie le sui usufono o Palauli se i tuu atu le avanoa i le Minisita o Tamaoaiga.

Afioga Hon Lautafi Fio Selafi Purcell: E leai se manatu e faalavelave i le lauga faataupou i si ou sui usufono mamalu mai Palauli Nu.1. Ae silasila foi ua pasia le Tulafono. O lea ua i ai aiaiga ua fai, ina ia tuuitiitia ai le aafiaga o fanau laiti i le mea lenei o le TV Bingo. Aua e pei o le mea lena lea e te tau saunoa ai.

E moi na taunuu atu lau tusi, ae ua ou tilotilo atu i le aso o lau tusi, ia ua 2 tausaga talu ai. Na ou faapea lea e pei e sese le tusi na avatu. Ae o lea lava e faapolopolo se taimi e te afio atu ai se i o ta talanoa leaga o lea sa fai si vevesi i le faaiuga o le tausaga ia ma taimi o aso malolo.

Ae ua pasia le Tulafono o lea ua i ai ia aiaiga e faaitiitia ai le aafiaga o fanau laiti. Aua o mea lava nei, o matua lava e tuuaiina ai. O lea ua tuu i le ta o le 10 i le po, e tasi lava le itula e fai ai foi ia lena taalogia, ia o le matua lava ma lana fanau i totonu o le fale.

A i ai la le matua e le faataua ia ia le vave ona alu o le tamaitiiti e moe ae e faanofo ai pea i i ma matamata i mea ia, ia o le matafaioi lena a le matua. E le mafai e le Matagaluega ona o i fale uma, e mautinoa o la ua momoe tamaiti. Aua e pei sa tele le avanoa sa tuu i TV Bingo, ae lea la ua pasia le Tulafono. E tasi lava le itula lea ua fai ai ae ua tuu i tua i le 10. O le taimi lena ua le tatau ona toe i ai se tamaitiiti o toe ala.

Ae faamalulu atu i le sui usufono, ua uma ona tilotilo i itu ia ma ua pasia le tatou Tulafono ma le faaaloalo lava.

Afioga AFOA AMITUANAI FALEULU MAULI: Faafetai mo le faamalamalamaga, sa ou savalivali atu lava i lou Ofisa i le aso lea e kiliva tusi ma fai se ta feiloaiga, ia na fai lava si ou pisi tele i fonotaga o le misela, o le mea lena, o lea la na taatia ai pea le tusi i ina ae ou sau, ia ma o le tulaga lea ua i ai, e faapea e sili ona aumai pea i luma o le tatou Maota, aua o se mataupu e aupito sili ona taua tele, ae se i faamaea atu pea le auina atu o le tusi lea, ma malamalama ai le atunu, o faafogafoga mai i le matou mataupu lea.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai, ou te leiloa po o sagatonu le tulaga o mea faapea, o tusi e fai e faipule ma lona itumalo ma le Matagaluega ae aumai lau lau i i. A faasao le mea lea, o lona uiga o le isi a tatou fonotaga, e 200 tusi e lau i i, ma maimau ai le taimi o le Palemene lenei.

O le a se finagalo o lau afioga ae faamalie le sui usufono, ua le toe aoga le tusi. Lea ua uma ona saunoa atu le Minisita, ua tautuaupega tele le aumaiga o lana mataupu.

FOFOGA FETALAI: Ia malie le sui usufono, o lea ua saunoa le Minisita, i ala o mea. O lea foi ua malele le afioga i le Palemia, o le tulaga lena.

Afioga AFOA AMITUANAI FALEULU MAULI: Ia faafetai i lau afioga i le Minisita, o le a ou usitaia lau faatonuga faapea foi le finagalo o le Taitai. Ae o le a le toe lauina le tusi, ae o le a faaauau pea si au lauga.

FOFOGA FETALAI: Ia faamaea mai foi le lauga le saunoaga a le sui usufono ua maea foi le taimi.

Afioga AFOA AMITUANAI FALEULU MAULI: Ou te faatusaina le toe tatalaina o taaloga faitupe i luga o le TV, leitio ma upega tafailagi e pei o le TV Bingo extra, o le tatalaina o le ala i seoli, ma le malaia i a tatou fanau ma ona tagata. This is the opening of the gate, and the road to hell for the children and people of Samoa.

Sa ou faalogologo i le faamalamalamaga a le Pulega o Taaloga eseese i luga o leitio FM i fesili mai i le mamalu o le atunu, ina ua toe tatala le TV Bingo. O lea...

FOFOGA FETALAI: Ia, ona o lea e pei e uso lava lau mataupu, ga e toe aumai ma le tusi.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai...

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: E i ai le upu masani a tatou, o le pou lava o le papala. Afai o le finagalo lea o le sui usufono, taofi Bingo, e faigofie tele lava le mea lena. Taofi uma lava Bingo. O le Bingo lava o le Bingo. O lona uiga e taofi Bingo e fai uma lava e Eklesia uma,

aua e leiloa foi po o fai ni Bingo a outou Ekalesia, taofi uma lava ma Bingo e fai i luga o le TV aua o le Bingo lava Bingo.

O le mea lena o lea ou te popole ai, po o lautele atu le finagalo o le sui usufono, i ni Bingo a lona itumalo. O fai ni Bingo a ekalesia uma te i ua e vavevave i le Bingo lea, ae ua e iloa foi o le Minisita lea, e nafa ma mea ia, e maai tele lana seleulu. I te i ua ooti atu le TV Bingo ooti uma atu ai ma Bingo na e sue ai tupe a ekalesia i totonu, ona tatou le toe feiloai lea i le isi faiga palota.

O le mea lena e tuu tuu mamao i le faautautaga ma le faatofalaiga. Aua o le mea lea foi sa tele manatu na aumai e taofi le casino. Ia o lau tala, afai loa e fai le faaiuga a le Kapaneta e taofi le Kasino, o le taaloga tau tupe, close uma loa mea uma. E i ai foi la ma le... aua e leai se eseesega. E i ai foi ma le talosaga na aumai ia te au, e taofi galuega e toe fai i le aso Sapati. Ia na o le fai o lau tusi, o le a close uma lava ia galuega. Se i vaai ane la po ua atoa mea ua ou avatua i le lisi. Taofi uma ma... close le falemai, taofi mai le Aso Faraile aua e 2 aso o le Alii. Taofi i le Aso Faraile faatoa tatala i le Aso Gafua. E le toe i ai se falemai e tatalaina, a mai le mai a le tagata ia fai i tua leaga e sa le faigaluega. Taofi ma Leoleo, e le toe i ai se leoleo, tapuni ma le vai, tapuni ma le eletise manaia le pogisa o le tatou atunu i aso e 3.

O le mea lea e faaaoga i ai ia le fetalaiga a lo tatou Alii, e pei ua laaloa ai le vaai, o le Sapati mo le tagata, ae e le o le tagata mo le sapati.

Lau afioga i le Fofoga Fetalai, o le mea lena o lea ou te fautua atu ai, tuu tuu i le loloto lau faautaga aua e maai tele le seleulu a le ... e avatu loa le mataupu lea tapuni uma Bingo, ona tapuni uma loa lea o Bingo ae lea ua uma ona fai le Tulafono. O le taimi lena sa tatau ona aumai ai lau mataupu.

Afioga Sulamanaia Fetaiai Tauiliili Tuivasa: Lau afioga i le Fofoga Fetalai pe maua se avanoa? E le faalavelave i le lauga a Palauli i Sisifo.

FOFOGA FETALAI: Se i tulai mai le sui usufono...

Afioga Sulamanaia Fetaiai Tauiliili Tuivasa: O le tulai o lenei sui usufono e matau atu i le taeao lenei le saunoaga foi o le... ua faatusa le Bingo o le auala i Seoli. E le matagofie ia faamaumauga i totonu o le tatou Maota Fono lenei. Leaga o la e fai uma lava taaloga a Ekalesia. O lea ua malele foi le tama o le atunu, e le avea foi le tatou faalogologo i lauga a Palauli i Sisifo e tuu avanoa ai ma leai ai se mamalu o lenei Maota.

A tatou silasila foi i tulaga o lenei sui usufono, ia e pei e faapena se lagona e sao ai saunoaga a le sui usufono, lea na uma atu nei o Salausa. O lea faatoa uma nei ona tatala lou auala, ae o lenei foi e te faasea mai e pei o le uiga o lou tulai atu, aveese saunoaga i auala ia, leaga o la e i ai ia taaloga a tagata ia e aveese ma faamaumauga o le tatou Maota faamolemole.

FOFOGA FETALAI: Ia ma e ou te faamalulu atu i le sui usufono, le sui usufono e ana le saunoaga lea. Ia masalo o le a maua se avanoa ta feiloi ma ou fautua atu ia te oe pe a fai le tatou malologa.

Ae o le a faataatiae a le Fono Aoao Faitulafono mo lana malologa masani, ona faaiu mai lea o le saunoaga, aua le toe taua lena mea.

Na faataatiae a le Fono Aoao Faitulafono mo lana malologa masani i le itula e 10:47 i le taeao ma toe amatalia i le itula e 11:33 i le taeao.

FOFOGA FETALAI: Ou te faasila atu ua toe amatalia Taualumaga ma Galuega a le Fono Aoao Faitulafono. Ma ua ou manatu ua maua le faasiliga malosi i Taitai o le atunu e faaaauai ai le tatou galuega.

Ia e faia ia le malologa o faapena ona tulai mai ia le sui usufono o Palauli i Sisifo e saunoa. E le o toe umi foi se taimi o le saunoaga a le sui usufono ma ou te fautuaina le sui usufono e aua le toe taua ia mea ua maea ona faia i ai ia le faaiuga a le Maota e ala i taaloga Bingo ma tulaga faapena ona ua maea ona pasia e le Tulafono e pei ona pasia e le Palemene. Ae see atu i se isi mea o le itumalo a leai, ia faaiu maia ia le saunoaga se i faagasolo ia le tatou galuega.

Afioga AFOA AMITUANAI FALEULU MAULI: Ia faafetai i lau afioga i le Fofoga Fetalai, mo le avanoa e toe amata ai lau lauga. Ae e le i amataina e fia faamalamalama atu le mataupu sa laga e si uso mai Vaimauga. Leai o le agaga o lou sui usufono, ou te le tetee i Bingo foi ia... Bingo uma ia e fai, e lagolago atoa lava i ai lou manatu aua o la e fai i pale lelei, fai mo maota ua uma ona faatino e fai ai Bingo. Ae o le agaga lea sa tuu atu, e le gata i Bingos ae mo taaloga faitupe eseese lea e faaalu i luga o TV ma le leitio ma upega tafailagi.

E peiseai o le tulaga la lea ou te talanoa atu ai, ae ou te le o talanoa atu i Bingo ia e fai. E lagolago malosi au i taaloga na. E matua lelei lava ia Bingo aua o la e o i ai tagata matutua, tama ma tina e tafafao ai ma eva ai. Ae o lea ou te talanoa i le tuusaoina o taaloga faitupe gambling, i luga o TV, leitio ma upega tafailagi. E pei o le tulaga lena...

FOFOGA FETALAI: Ua ou faamalulu atu i le sui usufono, see ese ia i se isi mea. See i se isi mea le saunoaga a le sui usufono mamalu, faamolemole ae taoto ia mea o Bingo. See atu i se isi mea aua le itumalo ma le tapuaiga.

Afioga AFOA AMITUANAI FALEULU MAULI: E peiseai o le tulaga lena e fia faamalamalama atu, ou te le o auese ai i taaloga Bingo

faitele. O taaloga na ia e lelei peiseai o lea ou te talatalanoa atu i tulaga foi ia o taaloga e le gata i Bingos, ae i ai nai isi taaloga tupe gambling e faaaoga i ai ia le TV, le radio ia ma le upega tafailagi.

FOFOGA FETALAI: Se malie ia le sui usufono, malie ua ou faamalulu atu ua ou faamalie atu. O lea la e tali lava i le faauilavea a le Vaimauga, ia ae e le o se mataupu lena o le tatou galuega. Ae malie ia taoto lena tulaga, ma e ao ona fai Tulafono a le Malo e atinae ai foi Ekalesia ma Faalapotopotoga. Ia se i tau fesoasoani atu Vaisigano Nu.2 po o fea le pepa lena ua oo i ai le lauga a Palauli.

Afioga AFOA AMITUANAI FALEULU MAULI: O le tuusaoina mai o taaloga faitupe i luga o TV po o leitio po o upega tafailagi. O se tulaga le mafaufau tele ia te au. E le mafaufau, matua **intrude le privacy o tagata**. O le tulaga lena e ala ai ona ou tetete tele. E le fai tasi i se TV bingo, text to text, o le free to text ea po o le a le isi ituiga taaloga lea e fai e fale foi i telefoni, e tasi lena mea. O le uiga o lau tala, ou te manao e puipui fanau, o tupulaga. Ou te le popole i le aumatutua ma i latou ua 21 agai i luga.

Afioga Fuimaono Teo Samuelu: Ou te fia fesoasoani atu i le sui usufono o lo o saunoa nei. Ou te iloa o le sui usufono e manaomia ona faaaoga o le mea lea, ou te iloa e le o lagona lelei e le sui usufono le faatonuga a le Nofoa ma le saunoaga a lau Afioga i le Fofoga Fetalai. Ma le agaga faaaloalo.

Afioga AFOA AMITUANAI FALEULU MAULI: Faafetai o lea lava ou te lagona. O lea e tau fai se tulaga foi lea ina ia mafai ona faauma atu le agaga o lau lauga. Aua o le tulaga lea sa i ai, e pei ua attack mai le lauga, ae e le i oo i le aano. O lea foi ua tipi i tua le faitauga o le tusi lea e i ai le **scion** o lau lauga, e taua tele....o lea la ua taumafai e fai po o le a se isi tulaga. Ae lau Afioga o le tulaga lena. Ou te le tetee i bingo ma tulaga faapea, ou te tetee i le tulaga o taaloga fai tupe e aafia ai a tatou fanau. Aua o fanau lea e i ai nei, e amata mai i le 21 agai i lalo, o latou nei ua expose talu ai le le mafaufau, o le alu atu lea o faasalalauga o taaloga fai tupe ma mea faapea. I lau tilotilo i ai e tele le afaina o tatou fanau i le tulaga lea.

FOFOGA FETALAI: Taoto maia lou finagalo se i toe silasila i ai le Malo ae see atu i se isi mea.

Afioga AFOA AMITUANAI FALEULU MAULI: O lea faatoa see atu nei lau Afioga le faamai lea o le misela. E tele atu le tulaga i le faamai lea o le a tupu nei i ituiga taaloga nei, i lo le faamai o le misela. O le mea la lea, ou te tatalo atu i le Minisita, faamolemole toe tagai lava i le tulaga lea. A faapea e aafia ai a tatou fanau ma lo latou lumanai manuia, ua tatau

ona taofi. A o le tulaga sao lava ia, e le o tusa ai ma le tulafono, e le o mafai e le pulega ma tagata e fai bingo, ona o e siaki po o moeiini mata o tagata ...ae ta le 10:00 fai a latou taaloga ma mea faapena.E pei o le tulaga lena, ao le tulaga i bingo ma gambling, se tatala atoa. Fai i fale la ua uma ona faatino e fai ai, aua o la ua i ai le Ofisa e o atu e siaki tagata e o i totonu, ma faasa tamaiti e o ai i totonu i mea na. O le tulaga lena o lea e taumafai atu ai. Ia faamuta mai le saunoaga a le sui usufono ua maea lou taimi.

FOFOGA FETALAI: Tulai mai le Minisita mo Galuega. Pe e i ai se fesoasoani i le mataupu.

Susuga Hon Papaliitele Niko Lee Hang (Minisita mo Galuega, Felauaiga ma Atinae Eseese): E i ai le fesoasoani lau Afioga. E fia faafesili i le sui mamalu pe na survey pe toafia alo ma ni fanau o aafia i lenei mataupu o le bingo i le TV. Aua e aumai le fautuaga, o lea foi ua uma ona saunoa le.....ua uma ona pasia le tulafono. Ae o la e pei e finagalo lava le sui ia e finau mai lona ia finagalo. Ae o le mea taua lena, e fai se survey pe fia ni alo ma ni fanau o aafia i lea tulaga. Ona e pei e tau **generalise** mai le fautuaga. Ae le o mautinoa, ona e aoga foi lea polokalame i le TV e fesoasoani foi, i ekalesia ia e taumafai mai. Ae o le finagalo lava lea o le sui mamalu lava ia, o lona ia lava finagalo lea. Ae pei o le a umi ai le tatou Fono i le mataupu lea a le sui mamalu.

FOFOGA FETALAI: O lea ua maua le saunoaga a le Minisita, ae o lea lava ua ou tatalo atu i lo tatou va faale-Nofoa i sui mamalu o lo o saunoa nei. Malie faamuta ia lea tulaga e pei ona e saunoa i ai, ae vaai se isi mea o le itumalo. Pe momoli foi ou alofaaga i le itumalo, e le o toe mamao foi ae tatou feiloai i le faiga palota tele o lo o loma nei.

Afioga AFOA AMITUANAI FALEULU MAULI: Faafetai i lau Afioga, ae mo le silafia e lo tatou Maota nei, o faafitauli ia e maua mai i tulaga faapenei, aemaise lava e aafia ai a tatou fanau. O le faamativaina o tatou tagata, aemaise e e vaivai le tamaoaiga ma tulaga e aafia ai aoga a tatou fanau, o tulaga faapena. E peiseai o tulaga na, e ala ai lava ona ou taumafai atu i le tulaga lea, ia silasila ae lo tatou Malo e puipui a tatou fanau. Ia aua ne i toe tupu ai se malaia po o se faamai e pei o le faamai lea na tea atu nei. Ou te iloaina e tele atu le aafia o i tatou, i le ogoga o se faamai, e le gata i le faavalevalea o a tatou fanau i le lumana, ae maua i le mea foi lele o le, **gambling mentality** o le a tele.....

FOFOGA FETALAI: Ua ou manatu o le a ou faamuta le saunoaga a le sui usufono. E faapena ona ou tuutuu avanoa ae peitai e te le o gausia lou finagalo i le fesoasoani atu. Ona o lo o faagasolo le tatou galuega i le

tulaga e pei ona i ai le tatou Tulafono Tau Faaofi o Tala Faaopoopo o le Tupe. Faamalie atu le sui mamalu ua ou faamuta le saunoaga a lau Afioga.

Afioga AFOA AMITUANAI FALEULU MAULI: Lau Afioga i le Fofoga Fetalai, e a pe a tuu maia le avanoa se i faauma atu ai lau lauga. O lea o le a faauma atu e tusa ai ma lou finagalo. Ae o le a le toe taua nisi tulaga.

FOFOGA FETALAI: Ia faaiu mai le saunoaga a le sui mamalu.

Afioga AFOA AMITUANAI FALEULU MAULI: Ona faaiu atu ai lea o le folasaga a lenei itumalo. Faafetai atu ai i le mamalu o le maota o Samoa, aemaise lau Afioga i le Fofoga Fetalai, ma le sui Fofoga Fetalai, lau Afioga i le Palemia ma le Kapaneta ae faapea sui usufono uma o le Maota, ma Samoa o lo o faafogfa tapuai mai i ona tulaga faalupe. Aemaise lou itumalo pele o Palauli i Sisifo Nu 1. Ia saga faamanuia le Atua soifua i faiva ma tiute o lenei tausaga 2020. Soifua ma ia manuia.

FOFOGA FETALAI: Malo saunoa. O lea ua e malo ia ta finauga. Faamalie atu Aleipata Itupa i luga, sa ave le faamuamua i Savaii e mamao, ae lafo atu. Se i faamolemole lava, lou gutu ma le afi, ae fia iloa po o ai ni sui o totoe e fia saunoa. A o le i tuuia atu le avanoa i le Taitaifono ma le sui Taitaifono o le Komiti o Tupe, faamolemole ina ia faamaumauina mo le tatou galuega. Ua ou iloa na o le toa lua. E fia lauga uma outou? Ia lelei, leaga o le tiute lava o le galuega e faapena, ae alolofa e faapuupuu mai. Ona o le tou toatele, o le a na o le tai lima minute o le sui usufono. Tulai mai Aleipata Itupa i luga mo lau lima minute.

Afioga AMITUANAI FAGAIVALU KENRICK SAMU: Faafetai atu i lau afioga i le Fofoga Fetalai, mo le avanoa foi, e puupuu lava. Se i taumafai atu ai foi se sao laititi o lenei itumalo, i lenei foi Tala Faaopoopo o le Tupe.

E muamua lava ona ou faatulou i le malu nei, o Tiafau o le malae o le faautugatagi a Samoa. Faatulou atu foi lau Afioga i le Fofoga Fetalai, o lau afioga e te faatonufolau i le Fonousu a le atunu. Faatulou atu foi i lau Afioga i le Palemia o le sui Palemia ma le mamalu o le Kapaneta, aemaise foi o Minisita lagolago. Faatulou atu foi i lena itu o le malu, i le afifio o Taitaifono o komiti eseese, ma sui usufono mamalu uma o le Fonousu a Samoa. Faatulou atu foi i Ofisa Sili o Pulega o Matagaluega o tupu ma tamalii, aua e le faagaloina la outou tautua matavela, aua lava se lumanai manuia o Samoa.

Lau Afioga i le Fofoga Fetalai, e puupuu lava se sao o lenei itumalo, e na o le lua lava minute.

E muamua lava lau afioga i le Minisita o Tupe, faafetai tele mo le Tala Faaopoopo o tupe, aua e talitonu, o galuega faaaauau ia a lo tatou Malo, aua le tautuaina o lo tatou atunuu. E ala i so o se manaoga o lo o manaomia. O lea e momoli ai le faafetai i le afioga i le Minisita aemaise le mamalu o le Malo, le Palemia ma le Kapaneta i la outou tofa fetuutuunai, aua lenei foi tausaga mulimuli o le tatou Paeaiga lenei.

O le a muamua atu lava i le Minisita o Galuega ma Atinae tetele. E muamua lava i le tatou malaevaalele i Tiavea. E nofo lava e lagona lava le faagaeetia ona o lea faamoemoe lelei o le Malo. E ui lava ina le i maea le galuega a o ata o tauleleia. Lau Afioga i le Minisita lau afioga i le Palemia, faafetai i le malaevaalele i Tiavea. Amuia o matou taimi ma o matou aso, aua o lea ua tulai mai le atinae lea a le Malo, o le a sasaa, e le gata i le tafa o Atua ia manuia, aua o lea o le a faaumaina le malaevaalele lenei. O le talosaga a lenei itumalo, e a pe a tau faaumi le malaevaalele. Aua e i ai lava le talitonuga o lenei itumalo, i nisi foi o tala ua aumai e nisi foi o saienisi, ua le toe saogalemu Faleolo mo le lumanai. O Faleolo o lo o taoto ai se tasi o papa tele e faigofie ona aafia ai le itu o le atunuu i mala faale-natura e pei o mafuie. A o le tatalo a lenei itumalo, aua e aoga mo le lumanai, se i silasila totoa a o lea e aga le faamoemoe lenei. E a pe a tau faatele laititi, aua a tutupu mai pefea i le lumanai, a o lea e i ai le malaevaalele lea e tua i ai si o tatou atunuu. Ou te vaai lava ma le alofa, i lea foi kamupani o lo o faatinoina le galuega, aua o le tele o aso e louloua le tau. A o le mea e pito sili ona taua, o la lava e sologa lelei le galuega i Tiavea. A o le tatalo a lenei itumalo, se i e alofagia.

FOFOGA FETALAI: Se i tulai mai le sui usufono mo Faleata i Sisifo.

Tofa Lealailepule Rimoni Aiafi (Faleata i Sisifo): E pei e foliga....leaga o lea e faamaumau saunoaga, e faafogofa mai le atunuu. O le malaevaalele lea e i Faleolo o le a ova i le selau tausaga o i ai. Na fai e maligi, o mai fai suesuega faatoa fai ai. E fai atu leaga e i ai sina ou malamalamama i ai. Ae o lea ou te fia iloa po o ai tonu le consultant le e fautuaina le sui usufono. Po le mea o la e fautuaina e Peseta, aua o ituaiga mea faapea, e tatau ona tatou puipui i ai. Faafetai.

Afioga Peseta Vaifou Tevagaena (Faasaleleaga Nu.2): Malie lau Afioga. Atonu o lea ua saunoa le sa faauluulu i ai le malaevaalele i Faleolo i ia foi vaitaimi o galue ai. E fai foi si ou malamalamama lelei i Faleolo. Leaga sa tofia au ou te galue i Faleolo ao avea le sui mamalu ma faauluuluga o le malaevaalele. O le mea lea e talanoa atu ai le afioga i le sui mamalu. O mea e tutupu i le lalolagi i ona po nei, e le o lou taimi, afai e te le o malamalamama, e le i tupu i lou taimi. Ae tatau ona e fesili lelei i le sui mamalu po o le a le taimi lea e tulai mai ai le **tone and trench** lea e tau

maua atu i le mea lea na aumai e le sui mamalu, ona agai tonu lea i ai o lou finagalo. Ma lou faaaloalo lava.

FOFOGA FETALAI: Se i saunoa mai le Minisita o Galuega.

Susuga Hon Papaliitele Niko Lee Hang: Faafetai mo le avanoa, na ona fia fesoasoani atu i le mataupu lea. E sao le saunoaga a le sui mamalu i le tulaga lea i le papa lea i lalo o le malaevaalele. O le papa lea, a tupu ni mafuie pei o le atunu lea o Toga e ono aafia mai, o le vaavaaiga lea ma suesuega a saienitisi o le lalolagi ua faailoa mai ia tatou le tulaga lea. Ae talitonu lava e mamao lava se taimi e aafia ai, ae o lea o le a tapena pea le Pulega o le Malae Vaalele i le tulaga lea e fautuaina mai e le sui usufono mamalu e toe faatele le malae vaalele i Tiavea. Ma o fuafuaga la ia e tatau ona tapena mamao i ai ina ne i mea ua tupu se mafuie tele aafia le tatou malae vaalele ona poloka foi lea o tatou femalagaaiga. O le tulaga lea lau Afioga. Faafetai.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai e fia maua se avanoa e le i saunoa foi le sui usufono mamalu. O le sui usufono mamalu o se uo mamae. Ae na o se faasaoga lava i le saunoaga a le sui usufono mamalu...

FOFOGA FETALAI: O ai lea e te fia faasaoa? O le sui o Aleipata po o...

Afioga Sulamanaia Fetaiai Tauiliili Tuivasa: O le sui usufono mo Aleipata Itupa i Luga faamolemole lava. O le uiga o le tulai o le sui usufono ona o lea lava e folo i manava le malae vaalele lea i Fagalii, e leai lava se gagana o lenei sui usufono, e usitai lava i finagalo ma atinae a le Malo. Ae pei o lea e saunoa le sui usufono lea fai mai talofa i kamupani o lo o mafatia ma tigaina. E pei e foliga o la e fai fua. E pei o le uiga lena o lau tala, e le o faia i ni pou tugane le mea le la o la e fai tupe. O lea la e pei e vaai atu i le misi alofa a le sui usufono lea i le malae vaalele, a o lea e tiga lenei itumalo, ae usitaia lava atinae. O lea ua tapuni Fagalii, e i ai se leo o le Vaimauga i lea atinae? A o lea e fai mai e toe faatele, o lea foi ua oo i le malae vaalele. O le uiga la o lou tulai, se faamolemole o le tala lea na fai mai nei a le sui usufono lea, fai mai talofa i le kamupani o lo o mafatia ma tigaina. E pei e foliga o la e fai fua. A fai fua la ua lagolagoina. Ae leai o la e fai i tupe a le Malo faamolemole. O lou tulai lea leaga o lea e faalogologo lou itumalo, avatu gugu ese lava le malae vaalele ma ou lima. O le a le mea ua i ai nei? O lea lava e usitaia, o le a le mea e alu i ai le Malo, leaga o le Malo lenei o Vaimauga Sasae e lagolago i le faigamalo a le HRPP. O le ala lea, leai lava se gagana. A o lea e le iloa po ua alu le la malae vaalele foi lele i te i ua alu atu pau le vaalele a o lea fai mai e

toe faatele. Se ua lava le la. A alu alu a o lea e faatalitali Fagalii, a alu alu lava toe omai, toe omai o lea lava e avanoa eleele o Vaimauga e toe faaland mai ai tatou vaalele. Ma le faaaloalo lava.

FOFOGA FETALAI: Se i tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, leai e le musu e faafinuina le mea. E le o se mea fou le mea lea lau Afioga. A tagai lau Afioga i le mea na saunoa i ai le sui usufono mamalu i le government change, e lata i o i le east. O i ina e taamilo mai ai le mea, o le mea lena e afaina ai tele i Tsunami ma mea faapena. E le o le itu lena. A vaai foi i papa o le atunu, e pito sili ona matua le papa o tua. E feololo le papa lea e i i ae laitiiti le papa lea e i Savaii. Taatia uma papa ia e i lalo o le tatou atunu lau Afioga, ne i te i ua faapea e... ae lelei o le mea e fai fuafua foi leaga e le faapea tatou te nonofo nonofo lava tatou omai i le Palestene. Na tatou aooga uma lava. Faafetai.

FOFOGA FETALAI: Faafetai. Ia se i saunoa maia oe ua lagalaga le Maota talu ai lau saunoaga, e le iloa pe moni mea ia e te aumaia pe leai, a ua lagalaga le Maota, ua tiga ai le laualo o le la toeaina ia Fagalii. E manaia le saunoaga a lau Afioga i le sui usufono....

Afioga AMITUANAI FAGAIVALU KENRICK SAMU: Ia e faafetai atu lau Afioga i le Fofoga Fetalai. O le a ou le tali lava i faauilavea na aumai. Ae na pau lava le agaga o lenei sui usufono, o le faafetai i le Malo i le atinae lea. E le o nei, e le o taeao a o le manuia o lea tafa o Atua. Faafetai i lau Afigoa i le Palestene mo le faamoemoe lenei. Na pau lava le tatalo, faaumi le malae vaalele. A o le manuia o le a sapi ai Aleipata ma lea tafa o Atua...

FOFOGA FETALAI: Ia se i tulai mai le Afioga i le Palestene.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ou te iloa e sese le lauga a le sui usufono o lea e fai mai ia te au ae o le Minisita o mataupu tau vaalele lea ua uma ona tali i ai. Soia e te fai mai soo ia te au ma le tutu mai o la toeaiina ma ita mai.

Afioga AMITUANAI FAGAIVALU KENRICK SAMU: Ia, o le a ou see mai i le malae vaalele lau Afioga. Ona ou oo mai lea i nai ou auala galue. O le lima lenei o tausaga o le Paeaiga lenei. So o se taimi lava ma te talanoa ai ma le Minisita o Galuega ma Atina Eseese, fai mai ou te talanoa i lana Minisita Lagolago. Lau Afioga i le Fofoga Fetalai, ona ou faapea lea i le taeao lenei, lau Afioga i le Minisita Lagolago, o le a ea se tonu o ou

aula galue? A alu alu e uma le tausaga lenei e le faia se auala, o le a i ai le mea e tupu ia oulua ma le Minisita.

FOFOGA FETALAI: Tulai mai le Minisita o Galuega.

Susuga Hon Papaliitele Niko Lee Hang: Lau Afioga i le Fofoga Fetalai, e le faalavelaveina le saunoaga matagofie a lau uo ulupoo lea e i tua i i, ae ua uma ona ma talanoa foi i ana auala, ua uma ona ou fautuaina, se o le tausaga mulimuli lava e manatua ai oe. A vave fai ou auala, aua nai tamai auala lava lea e tatalo mai ai, o auala foi nei na fai motumotu e tatau ona toe sosoo. Ia e faigofie lava, la e na ou fautuaina, onosai se i aulia le tausaga nei, tausaga mulimuli ona e vaai lea e palota uma lava lou itumalo ia te oe. E le o talia la le fautuaga na ave i ai, a o la e ua talanoa i le Afioga i le Minisita Lagolago. Ou te le i fai lava i ai e alu e talanoa i le Minisita Lagolago. O lea la ua ave sao lana talosaga, ia tali la oe le Minisita Lagolago. Ou te le faia ana auala ia e talanoa mai ai.

FOFOGA FETALAI: Ia se i tulai mai le sui usufono mo Sagaga le Usoga.

Susuga Seiuli Ueligitone Seiuli (Sagaga le Usoga): Lau Afioga i le Fofoga Fetalai leaga o lea sa taua lou suafa i le folasaga a le sui usufono. Ua uma ona advice i ai i le Minisita Lagolago lea e onosai, e saili muamua sona faletua o lea e leai sona faletua o i ai ona fai lea o lona auala galue. Saili muamua sona faletua leaga o lea ua leai se faletua o le Minisita Lagolago lea ona fai ai lea o lona auala. Ma le faaaloalo lava lau Afioga i le Fofoga Fetalai.

FOFOGA FETALAI: Ia se i tulai mai le sui usufono mo Aleipata Itupa i Luga.

Afioga AMITUANAI FAGAIVALU KENRICK SAMU: Lau Afioga i le Fofoga Fetalai, e sao lava lau tala na fai atu, a uma le tausaga lenei e leai sou auala e faia, e i ai le mea e tupu i se isi o laua nei. Ioe. Ae tatalo atu ma le faaaloalo i lau Afioga i le Minisita ma le Ofisa Sili o Pulega, se i alofagia nai ou auala ia mai Lalomanu, Vailoa ma Ulutogia, le matou faletolu lea, se i alofagia nai o matou auala.

Ona ou oo mai lea i le Minisita mo Faamasinoga. Faafetai i lau Afioga mo nai Faamasino fou nei ua tofia, o nisi foi o tupu ma ee o e ua ave i ai le faatuatuaga. Na pau le tatalo a lenei itumalo, fai ma fai ni a outou mafutaga foi nei, se i taumafai e fai ni nai talosaga i le Atua ina ia tuuina atu i alii ma tamaitai faamasino le mea e tau o le faamaoni, aua e pei lava o le mea lea o lea e lape ai le auauanaga, o le leai o se faamaoni. O lea lava ua oo i mea o

le aute lea o aiga ma nuu ae ua atagia le leai o se faamaoni i le faatinoga o tiute ma le valaaauina.

O le tatou Ofisa o Faiga Palota, faafetai tele lava i lea foi tamalii i le Komesina o Faiga Palota i nai suiga ia ua aumai o faiga palota, lea ua faataua ai le mea lava e te nofo ai ma e palota ai lava, fai ai lau filifiliga i le e avea ma sui usufono o le Maota lenei.

FOFOGA FETALAI: Malie le sui usufono se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le atoa lea o le mea ou te tulai atu ai e faaataata a lafoga a tatou saunoaga i totolu o le Maota lenei, a o le isi lea vaega o le tatou Tulafono Tumau, o lafoga e lafo i totolu o le Maota lenei i se tulaga lautele e aafia ai foi se vaega o le aufaigaluega a le tatou Malo ae le o nofoi i i e tali atu. O la e i ai auala e faatino ai lava e lea foi lala o Malo a latou foi galuega, e pei foi ona faatino e le tatou lala o le Malo tulaga o faaiuga e fai ia i latou ua faamaonia le le faamaoni i le faatinoga o galuega. E tatou te liolio foi i ai i saunoaga e ono tuuaia ai nisi ae le o nonofo mai i i e tali mai i a tatou tuuaiga.

E pei o se faamanatu lena lau Afioga e tusa ai ma a tatou felafolafoaiga o lo o faia nei.

FOFOGA FETALAI: Masalo o lea ua saunoa le Afioga i le Palemia, ua i ai foi se lagona faapena o le Nofoa e faamanatu atu i sui usufono mamalu tatou te aloaloese mai saunoaga e aafia ai le paia o le atunu aemaise o le mamalu o le tafatolu ona e le mafai e latou ona tali mai. Ae manatu foi e ui lava ina faalautele saunoaga, ae i ai le upu foi lele o si ota lima lava e paia ai si ota mata. E mau e faalele ae mau foi e taofi i le tulaga o lo o i ai saunoaga a sui usufono mamalu. Ia tautuana ma outou. Faaauau le saunoaga toe lua ou minute.

Afioga AMITUANAI FAGAIVALU KENRICK SAMU: Faafetai tele i lau Afioga i le Fofoga Fetalai. Ia ona ou oo mai lea i i i le tatou falemai, o le a le tele foi se tala i le falemai i Apia i le taimi foi o le misela, a o se laolao lelei lea e momoli ai le faafetai i le matou falemai i Lalomanu i le taimi foi o le faamai, sa vaaia lava ma le alofa le fitaituga foi o e o lo o galulue i teine tausisoifua ma tama tausisoifua i le taimi o le vevesi i le misela. Afai o outou faafogoa mai, malo le galulue. Aua o le mea moni lava, e leai lava se soifua na maumau o lenei itumalo i le faamai pei ona tulai mai. O lona uiga, tasi lenei itumalo sa agai lava e fai tui puipui mai lava i le amataga i le laiti seia oo lava ina oo mai i le taimi o le misela. A o le agaga faafetai ma le faamalo i a outou sa galulue i lea taimi, sa vaaia lava ma le alofa le galue punouai ina ia fofo le faafitauli.

Lau Afioga i le Fofoga Fatalai, ua uma se manatu puupuu e puupuu lava i nai vaega ia pei sa naunau lava e avatu ai foi se lagona ma se manatu i lenei vaega o le aso.

A o faafogaga mai si ou itumalo i le faletolu i Lalomanu, Vailoa ma Ulutautogia, i le afio o lau Afioga i le Tuiatua na Faanofonofo lau Tofa i le Matua aemaise le falefia o alii, Amituanai ma Suafa, le tootoo o le Igoamatua ma Saleaaumua, ia, faamalo le tatalo i le tatou nuu i Lalomanu.

I si ou nuu i Vailoa i le afifio o le Sao Fatalai ma le falelima o alii, afifio o Alaalamalae e tausi vaatele e Salelea ma Tualemoso. Ae le gata i lea o si ou nuu o Ulutautogia. I le susu o le Ie le afio o Sagapolutele, afio Falanaipupu o le Matua e tausi vaatele e le fetaliga ia Saoluafata. Ae le gata i lea o le mamalu i ao faalupega o lo o faafalelemalu aua se manuia o le itumalo, ia, o tatou o lo o tatou feiloai pea i aso uma ma tatou talanoa, a o le mea sili ona taua, o lo o aoina pea le masina i si o tatou itumalo. Ia manuia lau Afioga i le Fofoga Fatalai aua foi gasegase o le tino, ia agalelei pea le Atua. Ae le gata foi i lea o le mamalu i le Afioga i le Palemia ma lona auvaa aemaise foi o sui usufono uma o lenei Palemene. Ae le gata foi i lea e le faagaloina foi nai Ofisa Sili o Pulega o Matagaluega ma Faalapotopotoga a le Malo, ia outou maua foi le onosai ma le faapalepale aua foi feau tau amata o lenei tausaga. Soifua ma ia manuia.

FOFOGA FATALAI: Faafetai. Malo saunoa. Ma ou te tapa le sui usufono mai Faleata Sisifo e tulai mai e saunoa.

Tofa LEALAILYEPULE RIMONI AIAFI: E momoli atu le faafetai i lau Afioga i le Fofoga Fatalai mo le avanoa. Sa faapea e le o le taimi lenei ae faafetai tele lava i lau Afioga ua maua le avanoa o lenei sui usufono. Ia ona tatalo atu i lau Afioga e tusa ai foi o saunoaga a sui usufono o le Palemene, ia o le tatou tausaga mulimuli lenei, e aoga foi le maua o nai avanoa nei e avatu ai manatu aua lava fauteleina o le tatou sa i lenei foi tausaga ua amata. Faafetai foi ua toe faafoi faafoi le malosi i lau Afioga tatou te usufono ai i lenei aso. A ou vaai i ata ia e i tua o lau Afioga, na o oe lava e lua ou ata. O lona uiga, na o oe lava le tagata matautia lea e i ai i totonu o le Palemene o Samoa, a ia e faamalosi mai, ou te manao e tolu ou ata. E le i taitai le olaga o lena e te malosi, ioe. Na o le faaletonu lava o ou aao a o lou tino atoa ma ou aao e matua selau pasene.

Faafetai i le Atua i lenei tausaga ua tatou aulia ma le manuia. A tatou vaai foi i le tausaga na mavae atu nei, e momoli ai le faafetai i le tele o galuega faatino a le Malo. A tatou vaai i tua i le tausaga na tea nei lau afioga, i le tele o fonotaga a le lalolagi na usuia mai i Samoa, e leai se mea na faaletonu.

Oo mai i taaloga a le Pasefika, tatou patiapatia le matagofie ma le maoae o le mea na tatou oo i ai.

Ina ua oo i le faaiuga o le tausaga ma oo mai le misela e pei ona tatou talanoaina ma ave i ai le faamamafa i lenei vaitaimi, ona tatou manatua lea, faafetai i le Atua i le tele o galuega ma faamanuiaga ia Samoa. Aua tatou te manatu i le mea e tupu mai aua o le mea lava e tupu, e tupu ma e le mafai ona tatou taofia. Ae o le mea e faafetai, e oo mai, ua i ai ia le tapenaga a lo tatou atunu.

O au foi le isi tagata na maoaluma lau afioga. Na faateia lava i lea mea. Aua sa ou faapea e le tatau ona toe oo ia le tatou atunu i lea tulaga. A manatu i ai i le taumafaiga mai o Samoa, ma le tulaga maualuga ua oo i ai, sa ou faapea maoaluma i ou manatu, ua tatou oo i se tulaga e le toe faatonuina le paia o le atunu i tulaga o mea nei. O le mea e masani ai na tatou ola mai ai.

A vaai foi i le 2014, na siitia ai le tulaga o Samoa mai le tulaga o atunu e maualalo le tamaoaiga ma sii i luga i le tulaga maualuga ua i ai nei. Aisea? Lelei o le faatinoina o galuega, o lona tamaoaiga ma lona taitaiga. O mea uma ia na tatou galulue ma tau mafai mai ai. Ina ua tupu la ia le tulaga lea, ae ou faapea, talofa e, aua e ia te au lava ia ma lou aiga, o le toatele o tatou e leai se atuatuvale i lea mea. Aua foi na tatou ola mai lava o le mea masani. E tatau ona ave lau fanau e tui e puipua mai i faamai.

Ia ua uma le taimi e tatou te talanoa ai i tuuaiga po o ai e sese ao ai e sao. E pau le mea e fia faamamafa ai le manatu, i le taimi na tali ai le Malo. Na a le tali a tatou na tulai mai ai le faafitauli? O se aoga i ai tatou ma le lalolagi atoa. O le taimi e tali ai tatou ina ia toe faafoi ma tineai lenei mala na tulai mai, ina ia aua, aua ne i toe tulai mai i le lumanai.

O lea na mafua ai ona malolo le Malo, fai tuiga, fai ma le Tulafono, lea ua tatou faia le Tulafono, ina ia aua ne i toe tulai mai lenei mea i le lumanai. Aua e le mafaia e i tatou uma, ona e esesese ia finagalo. E i ai foi tagata e malolosi, e i ai tagata e vaivai, e i ai foi tagata e i ai ia o latou talitonuga, aua e malosi le tulei atu o le Malo ma le Matagaluega i mea e fai, ia ua malosi foi le tulei mai o le social media ma mafaufauga sese e fenumiai, e faaluafesasi ai ia finagalo o tagata.

Ia ae faafetai, sa fia fai lava lau tala ina ua tulai mai ia le Tulafono lenei, sa tatalo atu ai i lau afioga aepeitai e le i maua se avanoa i le taimi lea. Leaga na tupu ia te au i le tausaga na tea nei, na ma o ma lou toalua i Amerika e ave lou atalii e fa'aaoga i Amerika. Na tapa mai lava e le aoga lea ia aua ne i le avatua le pepa tui a lou atalii. Na ma o atu ma maua, o le mea muamua faafetai, faafetai i le Matagaluega, o la e talia e Amerika ia tatou pepa tui ia e avatua. E le i faapea e le i taliaina na matua talia.

E tasi lava le tui lea na fai mai le faiaoga le fomai a le aoga e tatau ona toe fai, o le tui lea o le MMR. Leaga e avatu le pepa tui a lou atalii e na o le MR. Manatua o le tui lea o le isi R lea o le Rupela, faatoa fai nei i le 2014, 2004 o se taimi faapena. O lou atalii lenei na fanau i tua atu, lea na ala ai ona toe fai, na toe fai i Amerika. Ae o le mea matautia lau afioga, e \$100 Amerika e toe fai ai le tui lea. \$100 Amerika le tui lea e fai fua e lo tatou

Malo, lea e fai fua. E 2 la tui na ma o toe fai. \$200 Amerika na alu ai. O lona uiga a faatupe, e \$200 Amerika, e \$500 toeitiiti \$600 Samoa i mea o lea e fai fua e lo tatou atunuu.

Po o le a le fai fua o mea, o le tatou galuega e fai, e le mafai ona tatou ta aofaiina finagalo o tagata ma i latou e le malamalama. A lea ua leva ona tatou faaaaoga fuaina tamaiti, faaaaoga fua. Ae toafia tamaiti e le o mafai ona ave i le aoga? Tatou te fiu e taumafai ae tatou taumafai pea, taumafai pea. O le tuualalo i lau afioga, o le a se lesona tatou galulue mo le agai i luma. O lea ua fai le Tulafono, ae o lau tuitui mai lava i le taimi faatoa ou sau ai i le Palemene, lau afioga i le Minisita o Falemai, tatou toe foi i le Public Health. Tatou toe foi i le mea na tatou masani ai, i le mea na tatou amata mai ai. Tatou toe taumafai mai ai.

O lea ua tatou mautinoa nei, o tatou lava ia i lo tatou atunuu, o le outreach, o le o i tua, o i tua e toe fai le tatou galuega. Aua e te faatuutuu, tatou o e fai le mea na sau ai. Ae faafetai, malo le galulue, malo le tulai mai i ai latou uma na fai sao i lenei mea. E aoga tele, e aoga le tulai i le taitaiga o le tatou Malo e tasi le faiga o le form mo le faafoia mo le agai i luma.

Tatou vaai i le mea lea na tupu mai i le Kamupani vaalele o le Boeing lea ua aafia atu ai ma le tatou vaalele, e leai se kamupani vaalele e mafaia le vaalele lea. Ova i le 100 tausaga o fauina vaalele o le lalolagi, ae o le a le mea na tupu ai? E i ai lava le sasi i mea uma lau afioga. E i ai lava le sasi i mea uma, ua matua tele lava le faaletonu o i ai nei, ma le faatuatuaga o le lalolagi i le tulaga lea na tulai mai.

O le uiga o lau faamatalaga lau afioga, o le lalolagi e i ai mea e fesasi ai. O i ina tatou te matimati ai ma toe iloa ai, le mea e ao ona fai mo le agai i luma.

FOFOGA FETALAI: Ua toe 2 minute o le sui usufono.

Tofa LEALAILEPULE RIMONI AIAFI: Tama, malie lau afioga o lea faatoa tau amata atu. Faafetai lava, faafetai lava, ae o i foi tatou te iloa ai ia taimi o taitaiga o tulai mai. O faafefea ona agai ia le tatou Malo? Agai i luma.

Ia faamisi ese mai lea vaega ou te talitonu ua lava ia finagalo e tatou te agai ai i lea vaega. Tatou galulue ai mo le agai i luma.

Ia lou itumalo lau afioga, e le tele ni manaoga o lenei itumalo mai le amataga. Lea ua saunoa le isi ou uso lea a sui usufono, ia Faumuina Wayne, le auala lea na ma talosagaina toalua mo Falelauniu.

Ia lau afioga i le Minisita, tali maia i se tali fiafia, e fua foi ia le atinae i le toatele o tagata o nonofo ai. E pei foi ona saunoa le isi sui usufono o Faleata muamua, ia e fai lava si toatele o tagata e i i ma ua leva le auala lea.... ae o o fanua nei, ua leva na totogi tuge e cover uma ai ia Public Utilities nei. Ae ou te talitonu, o lena o le a faatino ia le vaega lea.

Ae o le mea taua lea ua tulai mai, e momoli atu lava lau faafetai i le Minisita o Tina ma Tamaitai. I le tulai o le mea lea o le misela ma isi mea, e le o se manatu fou lea ua leva ona tuitui atu. O lena ua avatu lau talosaga i lau afioga ma le tamaitai Pule, e faafetai lava i tou mea ia na avatu nei tua mo le toe faatuina i totonu o itumalo. A ua tatau i se tulaga talafeagai i lenei tausaga, ua uma ona aumai ia manatu o tagata ia e nonofo i Vaitele, ina ia faia loa se Council, mo nofoaga nei amata i Vaitele, ma le tele o nuu tu taulaga nei e faasolo atu ai i Falelauniu, Vailele ma nuu i uta, ina i ai se Pulega faapenei e puleaina le nonofo filemu, o le nofo o le tamaoaiga lautele, aoga ma isi vaega faapea.

Sa fai le workshop faapea i le taimi o le UN le fetalaga foi ia Leaula Amosa i le Matagaluega ua fai si leva, na matou i ai uma foi lava i ai. Sa matou talanoaina foi le mea lea. Aepeitai ua uma foi lena taimi ma uma atu ai. Ae ou te talitonu ana fai mai i le taimi lea, e tele lava se fesoasoani i le taimi lenei. O lea ua i ai le fanua, ave le talosaga i le afioga i le Minisita, a ua tatau ona amata mo le taimi o i luma. E aoga tele, e le fata ina faatino ai ma le Health Centre i i, mo le manuia lautele o tagata, e fai ai foi ma le Centre mo tagata matutua e pei ona outou silafia, o i nofoaga nei, e tele tagata matutua e pei e litaea mai ai. Ae e tatau ona maua se fesootaiga ma le afioga i le Minisita, ia ta faatalanoaina lea mataupu, e aoga tele mo le agai i luma.

Ae e eseese ia manaoga o itumalo, matou ia i le taulaga, e moi lava e i ai nai auala, ae e pei o mea ia o vai eletise ma mea faapena, ia o mea na o lea e faamoemoe i ai matou ona o tulaga e i ai ia itumalo. Ae o vaega na o mea tau social issues, ia o mea na e tatau ona ave i ai ia le faamamafa. I le aoga, lau afioga i le Minisita o Aoga, faafetai, tele foi ia ou viiga ae tatau. E tele ia galuega lelei ae lea na ta talanoa faafia i le ta.. ua 3 au tusi na avatu. Lea foi na ou fai atu ananafi ae saunoa mai e toe avatu ia se talosaga, ae pei ua tau faaletonu lou mafaufau, aua a toe avatu nei ia ua 4 ai i i au tusi. Ia ae o lena e te silafia e i ai le taua. Na e saunoa mai, e manaia pe a ave i se mea tele foi lea o se college, e na o le tasi le Kolisi i Faleata atoa. Ia ae ou te talitonu te i ua tuai lea vaega ae lea e tulai mai lau afioga ae tatou amata pea i Primary School ona e moomia tele mo le agai i luma.

Ae faafetai i lau lagolago o lea ua maea le Hall a Faleata College talu na faavae mai lenei Kolisi faatoa fai lea o se Hall. Ia ae o le a umusa i se taimi lata mai ona logo mai lea o lau afioga e te alu atu e ooti ia le lipine.

Ae o le isi mea taua lava ou te fia faafetai ai i le Malo, lau afioga i le Palemia ma lau afioga i le Minisita, o le mea lea na toe tuu mai ai le avanoa i le Kolisi o Samoa e toe faafaoe le Kolisi o Samoa e le Sosaiete, e faipaaga ma le Malo. O se model pito sili lea ona lelei o lau tala sa fai i le Sosaiete, o tatou le Sosaiete e tele le aupopoto ae tele atu le aufiapopoto.

FOFOGA FETALAI: Ua maea le taimi o le sui usufono.

Tofa LEALAILEPULE RIMONI AIAFI: A tatou le faia lelei le mea lea, e le mafai ona toe tali mai le Malo i se mea e toe fai. O lea la...

Afioga Hon Afamasaga Lepuiai Rico Tupai (Minisita mo Fesootaiga ma Faamatalaga Tekonolosi): Lau afioga i le Fofoga Fetalai, ou te tulai atu ma le faaaloalo, o se tasi lenei o lauga matagofie i lenei aso i le faalogologo. Faatupu manatu foi i sui usufono o lea ou te tilotilo atu i le itu taumatau e na o le luelue ulu lava o sui usufono o Falealili ma faapea foi Vaimauga i Sisifo.

O le mea lea e talosaga atu, pe toe faaopoopo se isi 5 minute o le sui usufono mamalu ina ia faaauau ia lava saunoaga ma faamaea ai. Ia ma le faaaloalo lava faafetai.

FOFOGA FETALAI: Ia ona o le tatou galuega o lea e tulituliafulu ia le tatou galuega, e i ai le manatu e pei o le mea lea sa maua ai le avanoa o le sui usufono o Faleata NU.1. ona o le mea foi lea o le faamai sa manatu le Taitai o le Malo e faatu le lafo ina ia toe foi mai lava e faamanino ma faamalamalama auofala i le mea lea leaga sa galue ai ia le afioga i le sui usufono.

Ia ae o le faatu mai o le lafo, ou te teena, ou te teena le faatu mai o le lafo e toe 2minute o le sui usufono faamolemole ona o lea e tau tulei atu ia le tatou galuega faamalie atu i lau afioga i le Minisita.

Afioga Sulamanaia Fetaiai Tauiliili Tuivasa: Lau afioga i le Fofoga Fetalai pe maua se avanoa? E le faalavelave lava le sui usufono o Vaimauga i le saunoaga a le uso. Ia ae talu ai o lea ou te vaai atu i lau telefoni, ia ua misi e le sui usufono o Vaimauga ae o lea ua faamanatu mai e lou itumalo lea na saunoa ai le afioga i le sui usufono lau afioga i le Fofoga Fetalai, pei e faatu ia se Council i o i Faleata lea ua aafia atu ai ma Vailele.

Faamolemole e leai sau feau e te talanoa ai i lou itumalo, ona o le itumalo lenei o Vaimauga Sasae, o nuu mavae. Ae o lou itumalo o Vaitele, lea ua Vaitele fou Vaitele Uta Vaitele a? E na o Vaitele lava, o nuu na lea ua fai mai i ai ia le atunu, ae e te le afea Vailele leaga o nuu mavae nei lea o le a oo mai ai... fai pea lau mea i lou itumalo. Fai i le vaega lena aua e le o ni nuu mavae.

FOFOGA FETALAI: Ia se i tulai mai le sui usufono.

Tofa LEALAILEPULE RIMONI AIAFI: O Vailele e sao o nuu mavae, a ua toatele atu ai le au le mavae la e i ai. E pei foi o Vaitele o la e i ai ia faalupega o Vaitele o lena e te silafia o la e afio ai le sao ia Mataia, afio ai Galumalemana, ia ma Lealailepule uma. O le a la le isi faalupega e te manao ai?

Lau Afioga, leai e na o le faaooololomaau i lau afioga, ae e leai se isi e pule e pule lava lau afioga i mea uma. Ae e pei ona tatalo atu lau afioga, sa fia maua foi se manatu i le Tulafono na aumai i le misela, ia ae o lea foi ua toe talosaga atu i lau afioga, nai avanoa laiti mo matou. E le o toe mamao ia le tatou paeaiga, aua e leai lava ma se isi e mautinoa e toe foi mai.

FOFOGA FETALAI: Ana ua faauma mai ua uma ia.

Tofa LEALAILEPULE RIMONI AIAFI: Ia ua oo mai i le Minisita o le MNRE, e tele le faaletonu o le tatou... aua o le tasi lea o luitau tele i le lalolagi o le suiga o le tau. Ae o le mea lea lau afioga, se i tagai ane lava pe invest le Malo e aumai se masini e oomi ai mea o taavale. E tele ia o taavale lea ua fau solo ua leiloa po o fea a ave i ai atigi taavale. Tasi lena faafitauli lea ua tulai mai, ae manaia lava le invest i ina, aumai se masini a le Malo, a le o lena foi fai se faigapaaga ma se private sector e aumai se masini e oomi ai taavale nei ma toe lau i fafo, e faigofie. E le gata i lea o le teuteuga faifaipea o le tatou atunu. Lea ua vaai nei i si tamai matagi lea na sau, tele ia o le afaina o mea. E le i atoa se 10 minute. O le uiga o lau tala, e tatau ona faaaauau pea le galuega faifaipea a i latou nei e maintain ina laau, o alavai, o vaitafe, aemaise o taimi ia e tulalata ai i matagi ma afa. E tatau ona toe tagai i ai lau Afioga.

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mea fia faasao lau Afioga, e le faigata lena mea o lea ua i ai masini, na ona aumai lava o lola e lua tuu i totonu le taavale oomi loa uma. O lea la e i ai masini, ae na pau le mea ou te fia faasao i le sui usufono, o saunoaga faapea, o le suiga o le tau, tasi lea faafitauli o lo o faafeagai ma le lalolagi, o le sese lena e i ai, o le faafitauli aupito sili lenei ona tele tele i faafitauli uma lava, ae le o se tasi, o le pau lava lenei o le faafitauli a le lelei ona foia i le lalolagi atoa, ua leai se tatou.

Tofa LEALAILEPULE RIMONI AIAFI: Ia o lena ua faasao mai. O lau tatalo atu i lau Afioga i le Minisita mo le tatou vaalele, ua tatau ona toe tagai i le tatou motu lea i Savaii, toe fai le malae vaalele lea i Savaii. E matua moomia a, e matua moomia a. O la e mafai ona fai le avanoa e faipaaga ma vaalele ia e aumai se commitment foi lele ia latou, afaí e tatau ona alu i le tasi le vaiaso, ae tatau ona toe taumafai e toe vaai mo le agai i luma, e tatau ona taumafai e service le malae vaalele o lo o i Savaii, o lea ua i ai nai vaalele o la e fia o i ai ae toe faaleleia lau Afioga.

Ia, o lau Afioga i le Minisita o Tupe, faafetai lava mo le tatou Tala o le Tupe lea e aumai. O le mea lea e tatau ona toe tagai i ai i le taimi lenei, o le

issue lea e sau nei, o le mea lea o le black list ina o tatou i atunu tetele. O Farani lea na aumai i le masina na tea nei lea ua tutu tatou i lalo o le black list lea a atunu nei le SIFA. O le mea e fia malamalama se i fesili i atunu nei po ua i ai se latou faamaumauga ma se faamaoniaga e i ai ni tupe faaalatua aua o le mea lea e popole ai o tupe foi nei e alu e fund ai terrorism. Ou te talitonu e leai lava ma se tupe faapea o mafai ona oso atu i Samoa ma tagai i le SIFA a faigata ua tatau ona fai se tatou Off-shore Stock market. Ua leva ona taua e nisi o Minisita sa i ai muamua ae pei e manaia le uunai e faatilotilo i ai, amata i se off-shore ma agai loa i ai tatou e aoga tele lava mo le agai i luma o le tatou Tala o le Tupe e fesoasoani mo oe ma tatou uma.

Lau Afioga, e pei ua tau sola manatu ona o le taofi mai o le lauga. Ae le afaina, o le mea sili o lena ua... Na pau lava lea lau Afioga, le fale lea sa i tua le fale o le Palemene lea sa tatou tua i ai, maumau le fale. Maumau pe ana le tala i lalo. Aua o lea ua saunoa nisi sui usufono, ua leva ona fetulinai tatou i le timu a o le fale lea sa i tua, e le i taitai le fale. Ae a leai, ua tatau ona toe fai se fuafuaga, e ese le manaia o le mea pe ana tutu faatasi fale Samoa nei e lua, le fale lapotopotoga ma le fale foi lea e le lapotopoto lelei, o lena e te iloa ai le ata o Samoa atoa. A ua tatau ona toe tagai i ai lau Afioga i le vaega lea leaga e taua tele le mea lea.

Ma le mea mulimuli lau Afioga, o le tatou Ofisa leao faamaumauga, o le fatu atoa lea o le faiga o atinae a so o se atunu o le lalolagi. O le mea foi lea na ala ai ona aveese mai lalo o le Treasury toe faatutoatasi ina ia independent ma lelei le faatinoga o galuega. O le mea lea e talanoa atu ai i lau Afioga i le faaaogaina o le mea lea o le **SNBHe** saunoa i ai nisi o sui usufono. E fesootai ai Matagaluega a le Malo, e taua tele. O le mea lea na tulai mai nei, o le le lava ma lelei o le tapenaga o faamaumauga. Ae tatalo atu ai, sa ou sau sue le pepa oti o se tasi o aiga sa talosaga mai, ou sau i le Ofisa o Faamaumauga, fai mai si teine na ma talanoa, malie e leai se pepa oti e le i oo mai le falemai. Na ou alu atu i le falemai ou fai atu i le vaega e nafa ma le vaaia o mea ia, faamolemole na ou sau e avatu le pepa oti o si toeaina lea na valaau mai ai. Saunoa mai le teine sa i ina, malie na omai lava le aiga ave le original, ua leai la se matou kopi. E moni lau tala e le o se tala aveane ai. Ou fai atu, sole, matua tele le faaletonu. Ia, o lau fautuaga mo le agai i luma, ae o mea la, e le tau o fua tatou e fai, o lea ua uma ona taatia le infrastructure na aumai e le Malo e fesootai i ai. Na ona uma lava ona fai o le pepa oti i ina, sau i le Ofisa o Faamaumauga ma mea uma. O lea na ou sau nei i le taeao faasalalau mai mea ia o pepa aso fanau, na pau lava le mea e toe fia fesili ai lau Afioga, leaga o lea e sau ai le upu faapea, e le toe faaaogaina pepa papikema ma pepa papatiso o tamaiti e fai ai ni pepa fanau. Lau Afioga, o le pepa lena po o le a ma le a, o le pepa taua le pepa lena. E faapefea ona tatou le faaaogaina le pepa lea papatiso? O le pepa lena o lea na toe foi uma tatou e sue. E leai ni faamaumauga e maua i

i, ae maua i ina mea na. E faaaoga pepa na faamolemole e fesoasoani i tatou mea ia. E tele le mau pepa e te alu e sue mai faatoa fai le pepa fanau.

FOFOGA FETALAI: Malo. Ia, e i ai se mea le sui usufono mo Salega?

Tofa Olo Fiti Afoa Vaai: Lau Afioga i le Fofoga Fetalai, na ona ou faafesili atu lava i le Afioga i le Minisita Lagolago, pe le aoga foi le SNBH lea e fesootai ai le Ofisa o le Soifua Maloloina ma le Ofisa o Aoga foi lele e sau ai le information o mea o pepa tui ma le tau laina o nai loomatutua i uta i le tatou falemai e oo mai lava i le taimi lenei o la e fai. Ma le faaaloalo lava.

Tofa LEALAILEPULE RIMONI AIAFI: Lau Afioga, o la ua faaaoga le mea lena, faafetai lava. O lea foi na taua e le Susuga ia Laauli, o mea ia e faaaoga i mea o aoga, o le tali uma a lea o tatou, lea e nofo ma Afamasaga. Ioe. A faaaoga lelei e le Malo mea na aumai e le Malo le SNBH lea, e leai se mea tatou te toe popole ai i le leai o ni fomai ma ni faiaoga i le agai i luma ma faamaumauga. O faamaumauga le mea taua, e tatau ona hook up uma systems nei faatasi ona tilotilo lea i ai. O le mea lena o lea e taumafai i ai le Malo lea e taumafai ai ma le mea lea o le digital transformation lea e galalue i ai maua ma le Afioga i le Minisita. E tele ma galuega e fai, e tele tele galuega o lo o feagai ma le Afioga i le Minisita i lalo o lau fautuaga.

FOFOGA FETALAI: Faaiu mai le saunoaga a le sui usufono.

Tofa LEALAILEPULE RIMONI AIAFI: Lau Afioga, e avatu lau faafetai, faauma ia lea mea, atonu foi e maua se isi avanoa i se taimi. Na pau lava lea o le mea o le faafetai ma le faamalosi i le Afioga i le Palemia ma Afioga i Minisita o le Kapaneta ma i tatou uma lava. E pei ona malie le saunoaga a lou uso mai Faleata Nu.1, o le tatou asoa e fai faatasi. Ae aua tatou te naunauta ma tataou sue ai i mea. Afai e faaletonu le Malo, e i ai... o le galuega uma a tatou e aumai fautuaga e fai ai. Ae faafetai lava i le... ua lagona lou agaga faafetai i le Palemia i le tulai mai i taimi uma. E tasi lava le tagata ou te tilotilo i ai pe faapafea le handle ina o mea faapenei. Faafetai i le lototele ma le onosai, o lea ua tele faamatalaga e avatu a o le tele foi na o le tatou manuia ma le fesoasoani i le agai i luma.

Ia manuia tele lau Afioga i le Fofoga Fetalai, ia faafualoa pea lou soifua maua lau tofa aua le taitaiga o le Palemene, aemaise le aufaigaluega a le Malo, le tapuaiga a Samoa i ona tulaga faalupe, ia manuia lenei tausaga ia folau i lagima le tatou sa, ia manuia le tulai mai o Samoa. Ma le faaaloalo lava. Faafetai.

FOFOGA FETALAI: Malo faafetai. Ia faasolo mai le itu lea.

Tofa SOOALO UMI FEO MENE (Gagaifomauga Nu.2): Faafetai i lau Afioga i le Fofoga Fetalai mo le avanoa ua maua e taumafai ai foi se sao o lenei itumalo i le Tala Faaopoopo o le Tupe ua taoto i le Laulau a Fono. Lau Afioga fai mai a suataili le vai o Saunu ona taumua felagai lea o le fua mai Fiti. A o le pa na fausala i le fafa, fai mai na toe salatonu lava i le uii. Lea ua toe salatonu le pa na fausala, ina ua maea ona e faamanusina le tofa paia a le Atua i le taeao ua sola aua le tatou vatapuia ma lona mamalu Silisiliese. Faafetai o lea ua e tatala le lagi ma faasopo le ua, sema se manu ina ia ulimasao le Fonousu a Samoa ae a le tapuaiga mamala a Samoa o le atunuu tofi. Nona le viiga o le Atua ae nuu faatini o tausala i ana auauna totofi aua le latou fatuaiga tausi lea, o le latou faiva toi lea, tafu le magalafu, e nofo i le lefulefu, e afu i le ie talatala ma memumemmu i le ao ma le po, se i to ni manu aua le Palemene o Samoa aemaise Samoa uma o lo o soifua ma ola i le lalolagi a le Atua.

Lau Afioga i le Fofoga Fetalai, a tau matau i le tatou savaliga i lenei tausaga, mai lava i le la tausaga seia oo mai lava i lenei tausaga, talofa e ua le ese ma le ausaga, o le ausaga fai mai na sau i le vasa mamao, fai mai ua alu alu ua tu i le sami loloto, ua alu alu ua tu i le moana sausau, toe lava ina a ulito le vao latuivai, ona lafo lea o le taula i malolo, faailo pitofanua pe tali le Atua, ae a le aso. O ai e ana le aso? O le pule lena a le Atua. Lea ua e ee i lou nofoa vaevaeloloa ma lou fala na folaloa e faalogo ia te Oe Samoa. Lau Afioga i le Palemia, malo le toa, malo le tauatai, aemaise o lou auvaa, o outou o le muaau faalele, o le tali pulufana, o lelei ma mea leaga ia te outou.

E faafeiloai atu foi i le la Itu o le Maota i Taitaifono ma Sui Taitaifono aemaise sui usufono mamalu uma o toe Ulutaia o le Palemene ua tatou aofaga potopoto i lenei taeao. E faafeiloai atu foi i Ofisa Sili o Pulega o Matagaluega ma Faalapotopotoga a le tatou Malo, malo le pale, malo le onosai. Lau Afioga i le Fofoga Fetalai, e leai se toa na te toe tofi Samoa, e talatau Toga ae talatofi Samoa. Ona ou manatu lea ou te le toe seu tafilia paia o Samoa, aua o lea ua popo i Tiafau o le malae o le faautugatagi o lea ua atoa i mamalu ma paia o sa ma tapu o Samoa. Ona manatu lea e nuunuu i le au tulatoa ma le au fueloloa, o le latou fatuaiga tausia lea, mai lava i le tai samasama o le Tuimanaa seia paia Fili ma Puletuu, na iiite ai manu o Malo, emo le uila laulelei suluia Samoa i le talalelei, ae pine i Tiafau ua Faavae i le Atua Samoa.

Ona ou oo atu lea lau Afioga, e matau i lenei taeao e leai lava se sa e le i afe i le faamai na aafia ai si o tatou atunu. E manatu foi lenei itumalo tau ia ina avatu se matou faamaisega i aiga ua aafia, o aiga ua valaau le Atua i fanau. E momoli atu le faamaisega a lenei itumalo ma faamafanafanaga, o le matou tatalo, ia faapalepale le filemu o le Atua ma lona alofa e maua ai le mafanafana. E tele foi saunoaga i lenei aso i le tulaga i le aafiaga o le mafaufau, aafia foi lo tatou tamaoaiga ua faamauina i le tala o le tupe ua

feololo a tatou seleni ua alu ona o le naunau ina ia faapena ona aua ne i toe tulai mai lenei faamai po o nisi foi lava faamai i le agai atu i le lumanai.

E momoli ai le faafetai i le tatou Malo, faafetai i lau Afioga i le Taitai, e le alo le taumua o lou sa, sa e sautia, timuia ma laina, o Matagaluega, o Faalapotopotoga ma i latou uma sa faapena ona pulupululima faatasi aemaise le Matagaluega o le Soifua Maloloina, Agafesootai ma i latou uma sa faapena ona veloaso ina ia mafai ona vave ona foia lenei faafitauli. E taua lesona, e taua mea tutupu e aoaoina mai ai foi tatou e pei ona malie i le tele o saunoaga, e toe faufau ma toe matimati lo tatou sa e faapoi ma faagata aua ne i toe tupu mai i le lumanai. Faafetai tele ia te outou uma na fai sao ma veloaso i lenei faamoemoe.

Lau Afioga i le Minisita o Tupe, e momoli le faafetai ma le faamalo, e alu ma le au lenei itumalo pe a tau matau i le faamamafa ma le faamuamua i le soifua maloloina ina ia aua ne i toe tulai, le faalauiloa o tagata tafafao maimoa mai fafo o i latou sa aafia tele i lenei faamai. Ae le gata foi i lea o avanoa sikolasipi mo a tatou fanau e popoto ma atamamai, e manuia aiga manuia ai le nuu, e faapena foi ona manuia ai le atunu. Ma lo tatou siosiomaga a o lea foi ua ave i ai le faamuamua. E i ai le talitonuga o lo tatou tofi lena tatou te puipui malu. E \$23 miliona tupe faaagaaga, ae 1.2% o lo o faatumauina pea, le pasene o tupe faaalu e fuafua i tupe maua. O i e iloa ai le mataala ma le mataalia ma le lototetele, aemaise lava i taimi e faapena ona aafia ai i tatou i faalavelave e pei ona i ai. E momoli atu ai le faafetai ma le faamalo, e le gata i lau Afioga ma le.....aemaise foi o le Minisita o Tupe Maua o Faalapotopotoga o Matagaluega, ua tele lo outou sao i le faatupeina o lenei Tala o le tupe. Aemaise foi o le faaaogaina o tupe, fuafua tatauina ina ia aua ne i soona faaaoga, a ia ausia faiga faavae ua taoto o lenei Tala o le Tupe.

Lau Afioga i le Palemia ma lau Kapaneta, o le a le otooto taitasi o outou suafa aemaise foi o a outou matafaioi. E i ai lagona o le a ta aofai se lagona faafetai, i le tele o atinae faatino e le o po se lilo. O lea foi ua tele ina saunoa i ai sui mamalu o le Palemene, tele galuega lelei ua faatino e oo lava i nai o matou itumalo, e momoli le faafetai. E le selu atu, leaga e i ai le talitonuga tou te le mananao e lagi se pese pe fatu se vii, o lo outou tiute lea, o le avea ma Taitai o le avea lava lea ma auauna e tautua Samoa, malo faafetai.

Lau Afioga i le Fofoga Fetalai, ua faaiuiu le laugaae fia afe atu i le itumalo. Lo tatou falelua, Safune ma Samauga faafetai le tapuai, e le taua le sasau ae taua le faatalimau. E le taua foi le tao ma le uatogi, ae taua e latou te amo ina le fata o le tapuaiga. Avea lea avanoa ua maua, e momoli atu ai faamaisega, i le paia o lo tatou nuu aua le tuua o le malo, i le tama o lo tatou nuu, lau tofa Sooalo Faatoafe. Sa e tu i le foe ma e apo le tata ina ia aua nei tofatumoanaina le sa o lo tatou nuu. Aemaise lo tatou falelua, ma le tatou fale Gagaifomauga. Fai mai a lataluta le gataifale, ona sala lea o la fala ae tiu i la afa. Ae a fisaga le matagi, sala lea o le la afa ae tiu i la fala.

Talofa e, o le natura lea o le soifua ma le ola, e le faavavau ona tatou finau ma le finagalo o le Atua. O lona uiga e tutasi le pule aoao a le Atua, aemaise e na faasaosao, le paia o le aiga sa Peseta, aemaise le falefa ma lo outou faleupolu Samauga. Faamaise atu foi i lo tatou falelua lau tofa Tuua Tugaga, toafia o tulafale ma lo la toalua, le mamalu ia Safune ma Taulauniu, o le mamalu o Faletagaloa. Faamaise atu foi i lau tofa Lelio Leitu, ma lau tofa Lavea, tupu o le itu ma le tootoo o Finao, malo tapuai. Faamaise atu i le tina ma le aiga faavauvau aemaise le aufaigaluega totofi a le Atua, faafetai tatalo. E uma loa le ta umusaga o le ta faleaoga, fesili mai le Palemia, o ai le toeaina lea sa lauga, tau atu lou igoa, ae fai mai le Palemia, se e manaomia le ituaiga tofa faapea. Talofa e, ae leai se fai loto, tatou loto tetele ma faatuatua i le Atua, aua o le iuga lea o le tatou tautua, e i ai le taimi e i ai le aso e iu i aao o le Atua. Ia viia le Atua i lou soifua tautua.

Lau Afioga i le Fofoga Fetalai, ia sautuafafafa faamanuiaga a le Atua i lau afioga. Maua lou soifua laulelei e faaauau ai le galuega, aua e te tuufau le Maota, aua a gapapa le fau, e le gau. Ae gapa loa le toagau, aua e te fai mea tuufau. O le matou tuualalo lena.

Lau Afioga i le Taitai o le Malo ma lau Kabeneta, po o le a le tele o mea lelei, e tele foi faitioga. Ia mau le toovae, aua le tuliafuluina pe tulivavaaina ni vaivaiga, ae aoga mea e tutupu, e aoga foi le tuualalo e faufau manatu. E fou ai ai, e fou mai manu aua la outou nofoaiga. Sui mamalu o le Palemene, o le tatou tausaga mulimuli lenei, tatou pululima faatasi, o le a se mea tatou te mafaia, tatou momoli i le tapuaiga a le atunu. Ofisa Sili o Pulega o Matagaluega ma Faalapotopotoga a le Malo, faafetai tautua. Ia atamamai ma popoto, e tautua le atunu, tautua ma le faamaoni, tautua ma le alofa, aua ne i tautua fiamatai pe tautua foi e nanau i se taui, e i ai le taimi e i ai le aso e taui e le Atua lo outou tautiga. Ia faamanua le Atua ia te outou, o la matou tatalo, manuia le tapuaiga a Samoa. Soifua ma ia manuia.

FOFOGA FETALAI: Faafetai saunoa i lau Afioga i le sui mamau. Ma ua oo mai le faasologa i le Anoamaa i Sasae.

Afioga ALAIASA MUAGUTUTIA MOEFAAUOUO MALAGAITUTOGIA SEPULONA MOANANU: Faamalo faafetai i lau Afioga i le Fofoga Fetalai mo lenei foi avanoa ua maua e lenei usugafono. Ua fia tupoupou foi sa matou faamatalaga, ae faigata ua faalava le amoia, ua e saunoa e faavavevave o matou manatu. E le tetena lou finagalo leaga o le pule e fai tutasi i le Maota. E pau lava lea, e le umi foi se faamoemoe.

Ae avea lenei avanoa e faamanua atu ai le tausaga fou i le paia o le atunu. E ui lava foiina ua levaleva le malaga ae o lea faatoa maua se avanoa. O lenei foi tausaga o le tausaga o faamanuiaga, o le tausaga ua

tatou laa i le 2020. Tatou vaai taulai i manuia o le a agai mai. Sagai ane laia ai o le tai. O lele foi ua peia le ulia o le tauafiafi o le paega. O faasauga a tausala ma manaia aua ua tatou aga atu i le faaiuga o lenei Paeaiga. Aua o lea ua tu fala tupe mua o le taulafoga e ala i le tofa faalele, tofa faatupu, tofa faatamalii tootoo.Ua nonoi foi tootoo au o le atunuu.Tootooleaava tootoo-oleloloto aua lo latou faafaleupolu. O lea ua tauai tupe ma togi tupe i luga o le fala, se i fai i ai le filiga aua se manuia o Samoa. Tatou te le o mai tatou te saili manuia, o le auga o le faamoemoe o le avea ai o tatou ma sui o itumalo ma nuu ma afioaga. Ia manuia Samoa ma lana tapuaiga. E leai foi se agaga e faataumatatao i le Malo, e le seetia foi faapea mai, ua one state party. E leai e le seetia ai foi o matou manatu ma lagona i ia lafoga. Leaga e tofu lava le tagata ia ma lona manatu, aua ana tatou o i le mea lea. E tasi lava le taitai tatou te taitaina ai le faamoemoega o lo tatou atunuu manu o faigofie mea uma. A o nisi taimi ua ai ma le foa le faamoemoe, e toe tapuni atu le mama o le oa, ua faigata. Ua masaa le ipuvai, o le mea foi lea e i ai se lagona i lo matou usugafono. E le toe tapa, e le toe oo se matou tala i nei faamai sa o tatou i ai. E pei lava o lea e taulai le lumana, e pei ona lelei le Atua i le folauga a Samoa.

E pau lava se lagona e...o se agaga faamaise, ia i ai le faamafanafanaga o le agaga paia o le Atua i le aai o finagalo o le atunuu, i aiga ma e sei tulou na maumau le soifua ona o lenei faamai. A faapea foi na o matou taua e le i afea lo matou itumalo, aua ne i mitamita ai, a ia ave le faafetai ma le viiga i le Atua. O le mea foi lea e lelei ai le toaga e alu e asiiasi le itumalo. Tietie i le taavale ma tatalo i eleele o le itumalo, ia alofagia e le Atua aua nei.....ia i ai ana faamanuiaga.Ne i te i ua faapea le itumalo na o le fepasiai, ae le iloa o la e tatalo le leoa le tofi faipule, ia manuia. O le mea lea e tau e matou o le prayer walk. E faapena le faiga o le mea, pe a e alofa moni i lou itumalo. O lea a la e tali mai lava, e na o le faafetai lava, faamalo faafetai i le Atua i nei mea. Aua po o le a le maemae o le poto o sau nei, o lea lava ua tatou vaai i le tali ua aumai. Ae ui i lea, faagalo ia mea, tatou alo i luma lo tatou sa, lele ua taumua ava le tatou malaga.

O le aotelega o se manatu, e ao ona matou faufautua, o lea foi ua taatia mai le tamaoaiga, o lea e lelei.E tasi lava le **threato** so o se economy o le lalolagi, **its corruption and collusion**, o le mea nei e tupu ai le faamalaia o mea o atinae o le lalolagi. A maua loa i totonu o se Malo, e le gata foi o Malo ao Faalapotopotoga, a maua loa i totonu o se Malo ona faigata loa lea. O i ina e mamaioa ai le faamoemoe. Auau faatasi nisi mo le manuia o e e tau i ai, auau faatasi nisi mo le manuia o sona aiga. O mea la ia, e ese foi foliga, aua e i ai isi foliga e matagofie i le vaavaai, ae o la lava e eliel mai mea nei. O le mea foi lea e fautua atu ai i lau Afioga i le Minsita, se i silasila i tatou mea nei. A uma loa ona tapui mea ia, na o manuia lava tatou te seei ai. Ae na o se fautuaga, e leai lava se mea e faaletonu ai se tamaoaiga, seivagana ua o lua ma mea ia.

O si a matou Matagaluega o Aoga, ua leva ona tulai mai le matou talosaga lea, mea ia o ECE, ma tulaga ia. I le matou lava Matagaluega i le afioga i le Minisita ma le vaai i ai. Se o i lea e taoto ai le manuia lea, o le aotauina o fanau. O i foi e aveesea ai le mafaufau faigata lea e i ai le atunu, leaga e le i lava lelei le tapenaina o aoga faalemafaufau, fesoasoani i le faiga o faaiuga fai. O le tausaga faaleaoaoga e amata ia Ianuari, o le mea lea ua ou manatu ai, e pei ua tau....sa ou vaavaai ma faapea o le a faamuamua mai i le tala faaopoopo le mea....ae ui i lea, atonu e sii i nisi taimi. Ae o faamuamua ia e tatau ona tatou vaai i ai, ia ave la tatou faamuamua i le aotauina o fanau, o i lea e taoto ai le faamanuiaga, mo le tatou atunu mo le agai i luma. O le tausaga e 2019, e faapea lava le alualu o le tatou vaa i lea tausaga, e alu lava i luga le manaia, o taaloga a le Pasefika, e pei ona taua e nisi...